

後集一之四

宗族

姓氏

姓名

稱呼

名諱

祖父母

父母

父子

母子

事文類聚

新加坡書局藏

加3
167
2



門 4 3
號 167
卷 2

新編古今事文類聚後集卷之一

賜藎文庫

和父編

建安 祝穆

建業 唐富春 子和 梓

人倫部

宗族

同姓通譜 不肯通譜 妄認譜系 以上並附

群書要語

以親九族注 上至高祖下至玄孫夏侯歐陽等以為

九族者父族四母族三妻族二堯典疏 角弓刺幽王也不親九

族骨肉相怨小雅 葛藟王族刺平王也周室道衰棄其九族同

上豈無它人不如我同姓杖杜

利 267 2

東市書局

古今事文類聚後集

卷之一

德壽堂梓

散金宗族

疎廣棄官歸家日令家具酒食請族人故舊賓客相與娛樂居
歲餘廣子孫竊謂廣所愛信老人曰子孫欲及君在時頗立產
業今日飲食費且盡願丈人勸說買田宅老人以間為廣言此
計廣曰吾豈老耄不念子孫哉使賢而多財則損其志愚而多
財則益其過且此金聖主惠養老臣也宗族共享其賜盡吾餘
日不亦可乎

三世共財

樊重世善農稼好殖貨三世共財上下戮力財利歲倍貲至鉅
萬外孫何氏兄弟爭財重耻之以田二頃解其忿訟後樊宏傳

北富南貧

阮咸與籍居道南諸阮居道北然北阮富而南阮貧詳見七公門

百口同爨

魏楊道一家之內男女百口總服同爨庭無間言北史

妻勸異居

劉君良四世同居隋末荒饑妻勸異居因易置庭樹鳥巢令闢
且鳴妻曰天下亂禽鳥不相容况人耶君良即與兄弟異居月
餘知其謀斥去妻召兄弟流涕以告復同居

同居書忍

唐張公藝九世同居高宗有事泰山臨幸其居問本末公藝書
百忍字以對孝友傳

三世同爨

博陵崔倕總麻親三世同爨貞元以來言家法者以倕爲首生
六子一登輔相五任大僚太常卿邠太府卿鄆外臺尚書郎鄆
廷尉卿郇執金吾鄴左僕射平章事鄆而邠及鄆五知貢舉得
七百四十人邠昆仲自貴達亦同居光德里一宅

擊鼓會飯

裴寬兄弟八人於東都置八院相對甥姪亦有名常擊鼓會飯
犬亦共牢

江州陳氏宗族七百口每食設廣席長幼以次坐而食之有畜
犬百餘亦共一牢食一犬不至諸犬爲之不食小學

計口給餉

李昉家子孫數世至二百餘口猶同居共爨田園邸舍所収及

有官者俸祿皆聚之一庫計口日給餉

絹遺親族

范文正公自政府歸姑蘇焚黃搜外庫惟有絹三千疋令掌吏
錄親戚及閭里知舊自大及小散之皆盡曰宗族親戚見我生
長幼學壯行爲我助喜我何以助之哉卮史

白叙宗衮

以下係同姓通譜

謝康樂稱太傅爲宗衮

與巫通譜

唐趙彥昭遷中書侍郎同平章事以權倖進中宗時有巫趙挾
鬼道出入禁掖彥昭以姑事之其得宰相巫力也
尊爲父兄

李義甫已貴乃言系出趙郡與諸李叙昭穆嗜進者往往尊爲父兄給事中李崇引與同譜既謫普州丞削去

呼爲叔父

羅威賦詠甚有情致錢塘人羅隱有詩名威遣使賂遺自叙宗姪呼爲叔父 六帖

同譜復合

會稽黃渥與庭堅皆出於婺州之黃由七世以上失其譜以年相望與渥相近復以兄弟合宗 山谷作黃育字序

不許通譜 以下係不肯通譜

杜正倫求與城南諸杜同譜不許銜之諸杜所居號杜固其地有旺氣故世衣冠正倫既執政建言鑿杜固通水利既鑿川流

如血閣十日止自是南杜不振

不妄認祖

狄青爲樞密使有狄梁公之後持梁公畫像及告身十餘通詣青獻之以謂青之遠祖青謝之曰一時遭際安敢自附梁公厚贈而還之比之郭崇韜哭子儀之墓所得多矣 筆談

遙遙華胄 以下係妄認譜系

梁何昌寓爲吏部尚書有姓閔求官者昌寓問君是誰後答曰子騫後昌寓掩口笑曰遙遙華胄

認郭汾陽

五代唐郭崇韜爲樞密使用事自宰相豆盧革等皆附之以其姓郭因問崇韜曰汾陽王本太原人徙華陰公家世鴈門豈其

枝派耶崇韜曰因遭亂亡失譜牒嘗聞先人言上距汾陽四世耳輩曰然則固從祖也

通譜方相

唐有士人姓方好矜門第但姓方貴人必認爲親戚或戲之曰豐邑方相何親遽曰再從伯氏戲者笑曰既是方相姪只堪嚇鬼蓋豐邑坊乃造凶器出賣之地

妄認遠祖

有一故相遠派在姑蘇因嬉遊書其壁曰大丞相再從姪某嘗遊至此有士人李璋素好訕詭題其榜曰混元皇帝三十七代孫李璋繼至

筆談

古今文集

雜著

族譜引

蘇明允

蘇氏族譜譜蘇氏之族也蘇氏出於高陽而蔓延於天下唐神堯初長史味道刺眉州卒于官一子留於眉眉之有蘇氏自此始而譜不及者親盡也親盡則曷爲不及譜爲親作也凡子得書而孫不得書者何也以著代也自吾之父以至吾之高祖仕不仕聚某氏享年幾某日卒皆書而它不書者何也詳吾之所自出也自吾之父以至吾之高祖皆曰諱某而它則遂名之何也尊吾之所自出也譜爲蘇氏作而獨吾之所自出得詳與尊何也譜吾作也嗚呼觀吾之譜者孝弟之心可以油然而生矣情見於親親見於服始於縗而至於緦麻而至於無服無服則

親盡親盡則情盡情盡則喜不慶憂不弔喜不慶憂不弔則塗
人也吾所與相視如塗人者其初兄弟也兄弟其初一人之身
也悲夫一人之身分而至於塗人吾譜之所以作也其意曰分
於塗人者勢也勢吾無如之何也幸其未至於塗人也使其無
至於忽忘可也嗚呼觀吾之譜者孝弟之心可以油然而生矣系
之以詩曰

吾父之子

今為吾兄

吾疾在身

兄呻不寧

數世之後

不知何人

後死而生

不為戚欣

兄弟之情

如足於手

其能幾何

彼不相能

彼獨何心

蘇氏族譜亭記

蘇明允

匹夫而化鄉人者吾聞其語矣國有君邑有大夫而爭訟者訴
於其門鄉有庠里有學而學道者赴於其家鄉人有為不善於
室者父兄輒相與恐曰吾夫子無乃聞之嗚呼彼獨何脩而得
此哉意者其積之有本末而施之有次第耶今吾族人猶有服
者不過百人而歲時蜡社不能相與盡其懽欣愛洽稍遠者至
不相往來是無以告吾鄉黨隣里也乃作蘇氏族譜之亭於高
祖墓塋之西南而刻石焉既而告之曰凡在此者死必赴冠娶
必告少而孤則老者字之貧而無歸則富者收之而不然者族
人之所共誚責也歲正月相與拜奠於墓下既奠列坐於亭其
老者顧少者而嘆曰是不及見鄉隣風俗之美矣自吾少時見
有為不義者則衆相與疾之如見怪物焉慄焉而不寧其後少

衰也猶相與笑之今也則相與安之耳是起於某人也夫某人者是鄉之望人也而大亂吾俗焉是故其誘人也速其爲害也深自斯人之逐其兄之遺子而不卹也而骨肉之忍薄自斯人之多取其先人之貲田而欺其諸孤子也而孝弟之行缺自斯人之爲其諸子所訟也而禮義之節廢自斯人之以妾加其妻也而嫡庶之別混自斯人之篤於聲色而父子離處謹譁不嚴也而閨門之政亂自斯人之黷財無厭惟富者之爲賢也而廉耻之路塞此六行者吾時所謂大慙而不容者也今無知之人皆曰某人何人也猶且爲之其輿馬赫奕婢妾靚麗以欺罔君子是州里之大盜也吾不敢以告鄉人而私以戒族人也彷彿於斯人之一節者願無過吾門也予聞之懼而請書焉老人曰

書其事而缺其姓名使它人觀之則不知爲誰而而夫人之觀之則面熱內慙汗出而食不下也且無彰之庶其有悔乎予曰然乃記之

義田記

錢公輔

范文正蘇人也平生好施予擇其親而貧疎而賢者咸施之方貴顯時置負郭常稔之田千畝號曰義田以養濟群族之人日有食歲有衣嫁娶凶葬皆有贍擇族之長而賢者主其計而時其出納焉日食人一升歲衣人一縑嫁女者五十千再嫁者三十千娶婦者三十千再娶者十五千葬者如再嫁之數葬幼者十千族之聚者九十口歲入給稻八百斛以其所入給其所聚沛然有餘而無窮仕而家居俟代者與焉仕而居官者罷其給

此其大較也初公之未貴顯也嘗有志於是矣而力未逮者二十年既而爲西帥及參大政於是始有祿賜之入而終其志公既歿後世子孫脩其業承其志如公之存也公雖位充祿厚而貧終其身歿之日身無以爲殮子無以爲喪惟以施貧活族之義遺其子而已昔晏平仲敝車羸馬桓子曰是隱君之賜也晏子曰自臣之貴父之族無不乘車者母之族無不足於衣食者妻之族無凍餒者齊國之士待臣而舉火者三百餘人如此而爲隱君之賜乎彰君之賜乎于是齊侯以晏子之觴而觴桓子子嘗愛晏子好仁齊侯知賢而桓子服義也又愛晏子之仁有等級而言有次第也先父族次母族次妻族而後及其疎遠之賢孟子曰親親而仁民仁民而愛物晏子爲近之今觀文正之

義田贖於平仲其規模遠舉又疑過之嗚呼世之都三公位享萬鍾祿其邸第之雄車輿之飾聲色之多妻孥之富止乎一已而已而族之人不得其門而入者豈少哉况於施賢乎其下爲鄉爲大夫爲士廩稍之充奉養之厚止乎一已而已而族之人操壹爲溝中瘠者又豈少哉况於他人乎是皆公之罪人也公之忠義滿朝廷事業滿邊隅功名滿天下後必有史官書之者予可略也獨高其義因書以遺於世云

劉氏義學記

朱元晦

始予守南康隣境德安有宰焉爲政一本儒術甚以惠愛得其民歲饑爲請蠲租而州家不可顧民狼狽相驚有逃去者則亟使人追止之曰所不爲若等力請于州必蠲十七者令寧委印

綬去終不忍使若等爲異鄉鬼也民間是令下爲之感泣復相與携而歸衆乃具以情白州若部刺史竟得如約乃已予聞而切心善之而問其邑里姓名則曰王山劉侯也南康屬邑有越德安而懸隸者每遣掾吏循行則必戒使謁劉侯觀其荒政所施以爲法於是劉侯之惠不止行其封內而又波及南康之境竟食斯民得無流亡殍死者及予將終更乃得納謁劉氏之館而拜賜焉則望其貌聽其言而有以信其爲君子人也後數歲予以事過玉山則劉侯以待次家居復得相見如平生歡一日慨然語予曰吾家本單貧而入仕又甚晚顧無以仁其三族者間嘗割田立屋聘知名之士以教族子弟而鄉人之願學者亦許造焉兄弟之間有樂以其貲來助者而吾猶懼其或不繼也

則又出新安餘俸爲之發舉居積以佐其費而凡所以完緝丘隴周卹族姻者亦取具焉既已言於吾州而邦君吳侯樂聞之爲之出教刻符以詔吾之子孫使毋違吾志吾子雅知我其爲我記之以告其教學於此者使知有以勉焉予聞而嘆曰今士大夫或徒步至三公然一日得志則高臺深池撞鍾舞女所以自樂其身者惟恐日之不足雖廩有餘粟府有餘錢能無爲州里災害則足矣固未暇以及人也如劉侯者身雖寵而官未登於六品家雖溫而產未能千金顧其所以用心乃如此是則可謂賢達於人而亦可以見其前日德安之政不爲無本而匪以聲音笑貌爲之矣乃追本其事而記之如此雖然古人之所謂學者豈讀書爲文以干利祿而求溫飽之云哉亦曰明理以脩

身使其推之可以及夫天下國家而已矣群居於此者試以此意求諸六經孔孟之言而深思力行之庶其有以不負劉侯之教也劉侯名允迪字德華云

義莊記

陸務觀

東陽進士陳君德高因吾友人呂君友德來告曰德高不幸早失先人舉進士又輒斥念昔先人進德高輩於學蓋將使之事君使之字民以廣我先人之志顧雖自力而不合於有司之繩尺其如遂負所期望付託生何面以奉祭享死何辭以見吾親於地下不獲於仕進爲時雨爲豐年矣獨不可退而施於宗族乎於是欲爲義莊畧用范文正公之架度而稍增損之以適時變敢求文於執事者且載其事於碑予復之曰美哉吾子之志

也人之情於其宗族遠則疎之彌遠則益疎而至於忘之蓋以身爲親疎而不以先人爲親疎也視兄之子已或不若已之子已之子與兄之子自吾父視之有異乎能以父之心爲心則已之子與兄之子且不知其同異矣推而上之大父之孫爲從父兄弟曾父之曾孫爲從祖兄弟又推而上之至於無服雖天下長者不能無親疎之殺矣於乎制服不得不若是也若推上世之心愛其子孫欲使之衣食給足婚嫁以時欲使之爲士而不欲使之流爲工商降爲皂隸去爲浮圖老子之徒則一也死而有知豈以遠而忘之哉義莊之設蓋基於是然舉天下之能爲是者有幾非以爲不美而不爲也力不足也若陳君者自其先人勤勞節約以致饒餘而陳君不敢私有之其地在塋頭昭福

寺之傍初期以千畝今及十之七而吾地在塍頭者止此比隣
感其義皆欲期年間貿易以成之又植桑畜牛築堤以豐衣食
之源其詳見碑陰又有最當慮者吾子之心則盡矣後人或貪
而專利或嗇而吝出或夸而廣費或挾長挾仕挾有力之助而
敗約非有司者別白之則莊且壞不支府牧邑長丞掾曹吏及
鄉之鄉大夫先生處士其必綱維主張之使久而如一日陳氏
布衣也其貲產非能絕出一鄉之上而義倡於鄉如此吾徒仕
於朝宦于四方雖未必皆厚祿然聞陳氏之風不知愧且慕者
豈人情也哉于是併書以遺焉君之先君子蓋諱士澄字彥清
云

時當會族

謝昌國

凡人家法須令每有族人遠來則為一會以會族雖無事亦當
一月為之古人有花樹韋家宗會法可取也然族人每有吉凶
嫁娶之類亦須更相為禮使骨肉之意常相近骨肉日疎者只
為不相見情不相接也 善勸錄

古詩

命子

陶潛

悠悠我祖爰自陶唐邈為虞賓世歷重光御龍動夏豕韋翼商
穆穆司徒厥族以昌紛紜戰國漠漠衰周鳳隱於林幽人在丘
逸虬遶雲奔鯨駭流天下有漢眷余愍謂陶舍見功臣表於赫
愍侯運當攀龍撫劍夙邁顯茲武功書誓山河啓土開封疊疊
丞相 謂陶青見功臣表允迪前蹤渾渾長源鬱鬱洪柯群川載

道衆條載羅時有語默運因隆宥在我中葉桓桓長沙

謂陶侃

惟茲長沙伊勲伊德天子疇我專征南國功遂辭歸臨寵不忒

孰謂斯心而近可得肅矣我祖慎終如始直方二臺惠和千里

於穆仁考淡焉虛止寄跡風雲寘茲愠喜嗟余寡陋瞻望非及

顧慚華髮負影隻立

後段見姓名門

贈長沙公族祖一首

并序

陶潛

長沙公於余為族祖同出大司馬昭穆既遠已為路人經過潯

陽臨別贈此

同源分沉人易世疎慨然悟歎念茲厥初禮服遂悠歲月渺徂

感彼行路眷焉躊躇於穆令族允構斯堂詣氣冬輝映懷圭璋

爰采春花再警秋霜我曰欽哉實宗之光伊途云遠在長志同

笑言未久逝焉西東遙想湘渚滔滔九江山川阻遠行李時通

何以寫心貽茲話言進實雖微終在為山敬哉離人臨岐悽然

款襟或遼音問其先

示從孫濟

杜甫

平明跨驢出未知適誰門權門多踳踏且復尋諸孫諸孫曾無

事宅舍如荒村堂前自生竹堂後自生萱萱草秋已死竹枝霜

不繁淘米少汲水汲多井水渾刈葵莫放手放手傷其根阿翁

懶惰又覺見行步奔所來為宗族亦不為盤飧小人利口實薄

俗難具論勿受外嫌猜同姓古所敦

律詩

吾宗

杜甫

吾宗老孫子質朴古人風耕鑿安時論衣冠與世同在家常早起憂國願年豐語及君臣際經書滿腹中

贈益陽成之主簿并引

黃魯直

予之竄嶺南道出衡陽見主簿君益陽黃成之問宗派乃同四世祖兄于是出嫂氏子婦相見喟然念高祖父之兄弟未遠也而殊鄉異井六十歲而後相識亦可悲也益陽兄之叔父晦甫侍御在家著孝友之譽立朝有忠鯁之名不幸年五十有四被召而沒於道上將啓手足自力作疏極論濮園事所謂歿而不忘諫君以德其枝葉必將豐茂有赫赫於世者故作詩道之兩祖門中種陰德名塞四海世有人諸兒莫斷詩書種鮮有無雙登縉紳

又

人間鄉相何足道○骨次詩書要○不忘功兒邈○迨起屠釣何如林○中日月長

詩話

不重宗盟

陶淵明有贈長沙公詩序云予於長沙公為族祖同出大司馬昭穆既遠已為路人故其詩云同源分流人易世踈感彼行路眷焉躊躇蓋深傷之也杜子美訪從孫濟而不克於防猜故其詩云所來為宗族亦不為盤飧小人利口實薄俗難具論勿受外嫌猜同姓古所敦觀長沙公及濟則尊祖之義歸地矣韻語

陽秋

姓氏

群書要語

別生分類

注

生姓也別其姓族分其類使相從

舜典

錫土姓

注

以所生之土賜之為姓故天子建德因生以賜姓謂

有德之人生此地以此地名賜之姓以顯之

禹貢

姓者生也以

此為祖令之相生雖下及百世而此姓不改族者屬也與其子

孫共相連屬其旁支別屬則各自為氏

左隱公疏

天子賜姓命

氏諸侯命族族者氏之別名也姓者所以統係百世使不相別

也氏者所以別子孫之所出故世本之篇言姓則在上言氏則

在下也

史紀注

古今事實

帝王同姓

五帝三王自黃帝至舜禹皆同姓而異其國號以章明德故黃

帝為有熊顓帝為高陽帝嚳為高辛帝堯為陶唐帝舜為有虞

禹為夏后而別姓姒氏契為商姓子氏稷為周姓姬氏

史舜紀

以土為氏

炎帝之妻黃帝之姬因始所生地而為之姓

唐張說傳

舜由媯

汭故陳為媯姓

史

穆王使造父攻徐偃王破之乃賜以趙城由

此為趙氏

史

以封為氏

文王封子時叔於沈其後為沈氏 太公望本姓姜氏封於呂

故曰呂尚其後為呂氏 武王封太伯曾孫於閻其後為閻氏

晉穆侯封少子成師於韓其後為韓氏 晉獻公封畢萬於魏其後為魏氏 宋公子段食於褚其後為褚氏 宋太公食於蕭其後為蕭氏 楚賁皇食於苗其後為苗氏 晉叔向食於楊其後為楊氏 杞之後食於婁故後為婁氏 越之後食於歐山之陽故後為歐陽氏

以名為氏

陳伯表之後為表氏齊公子高之後為高氏衛公子惠孫之後為孫氏宋公子樂父之後為樂氏宋司寇牛父之後為牛氏魯閔子騫之後為騫氏

以官為氏

祭仲初為祭封人守封疆者後以為氏 漢孝文時居官者長

子孫以官為氏倉氏庫氏則倉庫吏之後也

以字為氏

隱八年無駭卒羽父請謚與族公問族於眾仲眾仲荅曰天子建德因生以賜姓胙之土而命之氏諸侯以字為氏因以為族官有世功則有官族邑亦如之公命以字為展氏

以物為姓

伯陽生於李樹下遂指李樹為姓 馬援其先趙奢為趙將能馭馬號馬服君後之子孫因以為氏 第五倫其先諸田徙園陵多以次第為氏 陸羽不知所生或言有僧得之水濱畜之既長以易自筮得蹇之漸曰鴻漸於陸其羽可用為儀遂以陸為氏羽為名而字以鴻漸

以字而訛

周封高陽之後於邾後為楚所滅子孫乃去邑而氏朱 周武
 王子邾叔子孫以國為氏其後去邑而氏于 東晉本疏廣之
 後曾祖避難去足為東 民儀本姓氏孔融嘲之曰氏字民無
 上可改為民徐衆評曰古之建姓或以所生或以官號或以祖
 今離析文字橫生忌諱是誣祖也 吳志 棗據避仇改為棘 文
 潞公本姓敬其曾大父避石晉高祖諱更姓文至唐復姓敬入
 宋其大父避翼祖諱又更姓文初敬氏避諱各用其一偏或為
 文氏或為苟氏然敬字從著 音棘 非苟也從支非文也俱非其
 一偏也 聞見後錄

以聲而訛

蔡伯喈作郭林宗碑曰其先出自周王季遷國命氏或謂之郭
 即其後也 魏初莫護政率部落入居西遼時燕代多冠步搖
 冠諸部因謂之步搖後音訛為慕容且以為氏 前燕錄 嵇康本
 奚氏後奚易而為嵇 唐辛替否本夏啓封支子於莘莘辛聲
 相近遂為辛氏 本傳注

因事而改

車千秋本齊田氏千秋以年老得乘小車出入省中時人謂之
 車丞相子孫因以為氏 賀姓本齊之公族慶封之後漢侍中
 慶純避安帝諱改為賀氏 唐源乾曜本禿髮偃擅之子賀入
 後魏魏太祖謂之曰與卿同源氏遂以為氏乾曜蓋其後也 傳注
 唐席豫席出安定其先姓藉避項羽諱改姓席氏

更易姓名 見後姓名門

冒姓不一

漢灌孟本張氏後為灌嬰舍人冒姓灌氏 衛青父鄭季給事
陽信公主家奴與衛媪通生青故冒姓衛 婁敬勸高祖都關
中賜姓劉 夏侯嬰為滕公隨母養外家因姓孫氏 鄭注本
姓魚冒為鄭故當時號魚鄭及用事人號為水族 貞羊干其
先本彭城劉氏十世祖凝之仕宋及齊受禪奔元魏自比伍員
因姓員氏 李元亮本姓安氏少為駱奉先養息冒姓駱氏
李勣本姓徐氏後賜姓李封英國公 李抱玉本姓安名重璋
元宗以其戰河西有功賜姓李改名抱玉 五代劉知遠其先
沙陀部人冒姓劉氏 石敬瑭其父臬捩雞本出於西夷其姓

石氏不知其始

作氏族志

唐太宗詔高士廉與谷文本等賡天下譜牒詳考史傳作氏族志

號肉譜

李守素為倉曹參軍通姓氏學號肉譜虞世南與論人物歎曰
肉譜定可畏許敬宗曰此名豈雅目耶世南曰昔任彥昇通經
時稱五經笥今以倉曹為人物志可乎

為世譜

歐陽文忠公蘇明允各為世譜文忠依漢年表明允以禮大宗
小宗為次雖例不同然皆足以考其世次余切惟文忠所謂不
知姓之所自而昧昭穆之叙則禽獸不若也其譏諛世之人可

可謂至矣然歐陽氏得姓凡幾年其間文學之士蓋亦多矣文忠始為之譜斯言恐未為得也

塵史

古今文集

雜著

論氏有九

凡氏之興九事賜氏於國齊魯宋衛也賜氏於謚戴武宣穆也賜氏於號唐虞夏商也賜氏以官則若司寇司馬賜氏以爵則若王孫公孫賜氏以字則若孟孫叔孫賜氏以居則若東門西門三鳥五鹿以志賜也巫氏匠陶以事賜也

潛夫論

姓氏更易

譜牒之不明也久矣自晉東渡五胡亂中原衣冠離散而致然也夫京房之先李姓也牛弘之先遼姓也疎之後乃為東民之後乃為氏閩人避王審之諱則沈氏去水而姓尤南中多危氏有惡其稱者或改為元如此之類甚多元魏據洛諸虜喜中原之姓而冒之者益眾則譜不可以不知也

塵史

姓氏不同

呂伯恭

三代之時曰姓者統其祖考之所自出者也百世而不變者也曰氏者別其子孫之所自分者也數世而一變者也天子建德因生以賜姓其得姓雖一而子孫別而為氏者不勝其多焉有以王父之字為氏者矣有以先世之謚為氏者矣有以所居之官為氏者矣有以如封之邑為氏者矣枝分派別千塗萬轍初若參錯紛亂而難考及徐而視之有綱有條猶指諸掌焉孟仲

季臧東門子叔同出於魯也游國封印公父伯張同出於鄭也
 向華蕩樂鱗魚仲老同出於宋也樂高崔國叔仲東郭同出於
 齊也尋其流可以知其源尋其葉可以知其根抑何易耶自秦
 漢以來氏族之制出於上之所賜下之所更者絕無而僅有至
 於世守一氏傳千餘年而不變者天下皆是也其變非若古之
 履其列非若古之多可謂簡而易知者矣然人罕有能辨氏族
 之源者王之氏一也吾不知出於元城之王耶宜春之王耶邛
 城之王耶劉之氏一也吾不知出於陶唐之劉耶奉春之劉耶
 元海之劉耶其能明辨而不惑者鮮矣氏之馬者未必能辨其
 為馬服之馬及馬矢之馬也氏之石者未必能辨其為周衛之
 石及後趙之石也古之氏族繁而知之者反多今之氏族簡而


知之者反少蓋由譜牒之明與廢而已以是知譜牒之學不可
 不講也

分別姓氏

問姓氏如何分別曰姓是大總腦處氏是後來次第分別處如
 魯本姬姓其後有孟氏季氏同為姬姓而氏有不同某嘗言天
 子因生以賜姓諸侯以字為謚因以為族切恐謚本氏字先儒
 隨他錯處解將去義理不通且如舜生于媯汭武王遂賜陳胡
 公滿為媯姓此即因生以賜姓也如鄭之國氏本子國之後駟
 氏本子駟之後如此之類所謂以字為氏因以為族也

朱語錄

新編古今事文類聚後集卷之一終



新編古今事文類聚後集卷之二

建安	祝穆	和父	編
建業	唐富春	子和	梓

人倫部

姓名

姓名偶同 更易姓名

群書要語姓所同也名所獨也盡心問其姓名俛而不答坡文

命名子生三月妻以子見于父父執子之右手唾而名之內則

若子已孤不更名曲禮

命字男子二十冠而字曲禮冠而字之敬其名也郊特冠禮祝

辭曰禮儀既備令月吉日昭告爾字字曰某父爰字孔嘉髦士

故宜宜之于嘏永言保之儀禮

詩句功曹上其言是日當登名韓兒童誦君實走卒知司馬坡

問之不肯道姓名杜不通姓字麓豪甚杜南宮起草舊連名韓

故人漸遠無消息古寺空來看姓名坡我名公字偶相同荆公

古今事實

父母史無姓名

前漢去古未遠風俗質略故太上皇無名母媪無姓然唐宰相世系表叙劉氏所出云晉士會適秦歸晉有子留于秦自為劉氏秦滅魏徙大梁生清徙沛生仁號豐公生瑞字執嘉生四子伯仲邦交邦漢高祖也高祖之父漢史不載而其名唐史乃載之亦可一笑蘇繁露

欲逃姓名

後漢韓康伯字伯休賣藥長安市時有女子從康買藥康守價不移女子怒曰公是韓伯休耶乃不二價乎康歎曰我本欲逃名今小女子皆知我何用藥為

不告姓名

李白失意遊華山縣宰方開門決事白乘醉跨驢過門宰怒不知太白也引至庭下曰汝何人輒敢無禮白乞供狀無姓名曰曾用龍巾拭吐御手調羹力士脫靴貴妃捧硯天子殿前尚容吾走馬華陰縣裡不得我騎驢據遺錄

草木知名

德宗徙張萬福為濠州刺史曰先帝改爾名正者所以褒也朕

謂江淮草木亦知爾威名因復賜舊名

虜問姓名

裴度討吳元濟平淮西以功封晉國公名震四夷使外國者其君長必問度年幾狀貌孰似本傳

名覆金甌

元宗每命相皆先書其名一日書琳等名覆以金甌會太子入帝問之太子曰非崔琳盧從愿乎帝曰然

書名探丸

宣宗命相必探中外有人望者三兩人姓名撚之成丸致香案上以物覆之焚香探丸始命草麻

探名瓶中

五代盧文紀形貌魁偉廢帝奇之及帝立欲擇相悉書清望官姓名內琉璃瓶中夜焚香告天以筋探之首得文紀欣然相焉

惡其姓桑

桑維翰舉進士主司惡其姓桑喪同音人勸勿舉進士維翰著日出扶桑賦以見志又鑄鐵硯曰硯敝則改而他仕卒及第

虜敬司馬

遼人夏人遣使入朝與吾使至虜中者虜必問公起居及為相遼人勅其邊吏曰中國相司馬謹毋生事開邊隙

婦孺知名

司馬公上疏論新法利害曰後當如是行之十餘年無一不知公言者天下傳誦以公為真宰相雖田父野老皆號司馬公而

婦人孺子知其為君實也 行狀

名聞宮禁

王樞密疇之夫人梅鼎臣之女也景德初梅夫人入謝慈壽宮太后問夫人誰家子對曰梅鼎臣女太后笑曰是聖俞家乎由是始知聖俞名聞宮禁也 歸田錄

醉人不識

東坡云自得罪以來深自閉塞扁舟草屨放浪山水間與漁樵雜處往往為醉人所推罵輒自喜漸不為人識平生親友無一字見及有書與之亦不答自幸庶幾免矣 同李端叔書

兩曾參 以下係姓名偶同

有與曾子同姓名者而殺人人告曾子之母母曰吾子不殺人

織自若有頃焉人又曰曾參殺人其母尚織自若也頃之又一人告之曰曾參殺人其母懼投杵踰墻而走 戰國策

兩毛遂

野人毛遂墜井而死者以告平原君平原君曰嗟乎天喪子矣既而知非真毛遂 西京雜記

兩子夏

杜欽字子夏少好經書家富而目偏盲茂陵杜鄴與欽同姓字俱以材能稱京師故衣冠謂欽為盲子夏以相別欽惡以疾見詆乃為小冠高廣財二寸由是京師更謂欽為小冠杜子夏而鄴為大冠杜子夏云 本傳

兩孟公

陳遵字孟公時列侯有與遵同姓字者每至人聞曰孟公坐中莫不震動既至而非因號其人曰陳驚坐云

兩韓翊

韓翊唐德宗時制誥缺人上批曰與韓翊時有與翊同姓名者為江淮刺史所司具二人同進上復批曰春城無處不飛花寒食東風御柳斜與此韓翊

二人同名

顧雍字元歎蔡伯喈異之謂曰卿必成名今以吾名與卿故雍與伯喈同名 後魏游肇為廷尉時尚書令高肇宣武之舅以肇名與已同欲令改易肇以孝文所賜守正不許高甚銜之往時學士入劄子不着姓但云學士臣某先朝盛度丁度並為

學士遂着姓以別之其後遂皆着姓

歸田錄

子名類父

杜相鴻漸之父名鵬舉父子而似兄弟之名蓋有由也鵬舉嘗夢有所之見一大碑云是宰相碑已作者金填其字未作者刊名於柱上因問有杜家兒否曰有任自看之記得柱下有鳥偏旁曳脚而忘其字乃名子為鴻漸而謂之曰汝不為相即汝之名字當鳥旁而曳脚也名字且前定况官與壽乎

名同古帝

德宗使人諭陸贄曰苗粲父晉卿往年攝政有不臣之言諸子皆與古帝王同名今不欲明行斥逐兄弟各宜降外官贄奏曰凡有譖愬之輩多非信實之言

真文忠德秀大學衍義云趙堯李舜未聞爲逆於當時王
莽曹操不假襲名於前代而諛者以此誣之可謂寃矣使
無宣公庸得免乎宋仁宗時宋郊以名儒進用有諛之者
曰姓符國號名應郊天郊不自安改名曰庠然仁宗未嘗
疑之而不命之相也欲堅諛說者其必以仁宗爲法

改名作相

以下係更易姓名

范睢事魏中大夫須賈賈爲魏昭王使於齊齊襄王聞睢辯口
乃使人賜金千斤及牛酒睢辭謝不受賈聞之大怒以爲睢持
魏國陰事告齊故得此饋既歸以告魏相魏齊齊大怒使舍人
笞擊睢折脅摺齒睢佯死即卷以簣置廁中賓客飲者醉便溺
睢及得出伏匿更名姓曰張祿既相秦魏謂秦相張祿而不知

其爲范睢也秦東伐齊將及魏魏使須賈求成於秦睢聞之微
行敝衣間步之邸見賈賈驚曰范叔固無恙乎曰臣爲人傭賃
賈哀之留坐與飲更取一綈袍賜之因問曰秦相張君公知之
乎睢曰主人翁習知之唯睢得謁願爲君借大車駟馬辭歸取
大車駟馬爲賈御之入相府睢先入賈待之良久問門下曰范
叔不出何也門下曰此吾相張君何范叔也賈大驚自知見賈
乃肉袒膝行謝罪睢曰爾罪有三所以得無死者以綈袍戀戀
尚有故人之意因盡請諸侯使與坐堂上飲食甚設而坐須賈
於堂下置莖豆其側令兩黥徒夾而食之數曰爲我告魏王急
持魏齊頭來不然者我且屠大梁

更名去位

范蠡事越王竟滅吳雪會稽之耻稱大將軍以為大名之下難居乃裝其輕寶與其徒屬浮海出齊變姓名自謂鴟夷子皮耕於海畔居無幾置產數千萬齊人聞其賢以為相蠡喟然曰居家則致千金居官則致卿相此布衣之極也又受尊名不祥乃歸相印盡散其財以與知友懷其重寶間行以去止於陶以為天下之中通為生自號陶朱公

更生改名

劉向本名更生恭顯等誣譖堪猛更生傷之乃著疾詭摘要後更名向

既貴歸姓

范文正公二歲而孤隨母改適山長朱氏遂冒姓朱後歸姓范

以甲乙名

以下係命名

殷家質直故以生日名子尚書言太甲帝乙武丁是也不以子丑名者何也曰甲乙者幹也子丑者奴也幹者本本實故以甲乙為名也 白虎通

以尼丘名

叔梁紇與顏氏女禱於尼丘生孔子孔子生而首上圩頂故名丘字仲尼 史

以鯉名

伯魚之生適有饋孔子魚者喜以為瑞故名鯉

以柳樹名

展禽之家有柳樹身行惠德故號曰柳下惠 淮南子

以同物名

威六年九月子同生

丁卯年

以太子生之禮舉之接以大牢卜士

負之士妻食之公與文姜宗婦命之公問名於申繻對曰名有

五有信有義有象有假有類以名生為信

若成季生而有文在手遂命之為友唐叔

虞生而有文在手曰虞遂名虞

以德命為義

若文王名曰武王名發

以類命為象

若孔子首象尼

山遂名

取於物為假

若伯魚有人饋魚因名鯉

取於父為類

若子同生與父同物

不以國

不以官不以山川不以隱疾不以畜牲不以器幣周人以諱事

神名終將諱之故以國則廢名以官則廢職以山川則廢主以

畜牲則廢祀以器幣則禮晉以僖侯廢司徒

僖侯名司徒廢為中軍

宋以

武公廢司空

武公名司空廢為司城

先君獻武廢二山

二山其教也魯獻公名具武公名敖

更以其鄉名山是以大物不可以命公曰是其生也與吾同物命之曰

同左後漢鄭玄孫小同以丁卯日生而玄以丁卯歲生故名小

同後漢書

以仇師名

晉穆侯伐條之役生太子命之曰仇其弟以千畝之戰生命之

曰成師師服曰異哉君子之名子也夫名以制義義以成禮易

則兆亂君命太子曰仇曰成師始兆亂矣兄其替乎

以於菟名

見虎門

以蘭名

見蘭門

以慕賢名

司馬長卿父母愛之不欲稱斥名大子慕蘭相如之為人遂改

名相如

以門閭名

晉賈充字公閭父達晚始生充言後當有充閭之慶故以命名字焉

以名為戲

梁何敬容為尚書令淺於學術拙於草隸署名敬字大作苟小為文容字大為父小為口陸倕見而戲之曰公家苟既奇大父亦不小敬容不能答

字則未聞 以下係命字

孟子名軻字則未聞或曰字子輿一字子車

以臺命字

趙岐字邠卿初名嘉其祖為御史岐生於御史臺因字臺卿

諱犯父字

魏司馬朗字伯達九歲客有道其父字者朗曰慢人親者不敬其親者也客謝之 魏常林事同見年齒門

以戲命字

阮孚母祖姑家胡婢也父咸通之生孚咸遺姑書曰不意今日遂生胡兒姑荅曰靈光殿賦云胡人遙集於上楹便可以遙集為字咸從之

古今文集

雜著

姓氏諸說 見前姓氏門

名號花書

唐人初未有押字但草書其名以為私記故號花書韋陟五雲體是也余見唐誥書名未見一楷字今人押字或多押名猶是此意王荆公押石字初橫一畫左引脚中為一圈公性急圈多不圓往往窩匾而橫畫又多帶過嘗有密議公押及字者公知之加意作圈一日画楊蟠差遣勅作圈復不圓乃以濃墨塗去旁別作一圈蓋欲矯言者楊氏至今藏此勅

石林燕語

名同行異

陸龜蒙

邵侯姜女之生子也始棄之命之曰棄宋芮司徒之生女也始棄之亦命之曰棄邵為稷官蒸民賴之宋棄姜而生佐幾移宋祚名之同也奚傷舜重瞳子項羽亦重瞳子形之類也奚病擇其道何耳

雜記

慕古賢名

顏之推

昔司馬長卿慕藺相如故名相如顧元歎慕蔡邕故名雍而後漢有朱張字孫卿許暹字顏回梁世有庾晏嬰祖孫登連古人性為名字鄙才也昔文饒不忍罵奴為畜產今世愚人遂以相戲或有指名為豚犢者有識旁觀猶欲掩耳况當之者乎

家訓

名本而字末

君之於臣先生之與其門人名之可也至於同官之於僚黨同姓之於昆弟同門之於朋友可以稱其字而不可斥其名故公羊傳曰名不尊為人所名則近乎見卑也古之君子之名子也字則近乎曰尊為人所名則近乎見卑也古之君子之名子也必以信義而擇淑令所以祥其名也不以官職所以殊其名也

不以畜幣所以重其名也不以隱疾所以顯其名也通告內外所以昭其名也書而藏之所以寶其名也賤者避焉所以貴其名也冠而有字所以尊其名也名成乎禮字依乎名名字之本字名之末也為本故尊為末故卑尊故其禮詳卑故其事略且婦人無名故賤於丈夫野人無名故賤於學士名者已之所以承尊尊者之所以命已字則已之所以接卑卑者之所以稱已未有用之於尊而為卑用之於卑而為尊者也

太平御覽載秦記

雜著 係命名

二子名說

蘇明允

輪輻蓋軫皆有職乎車而軾獨若無所為者雖然去軾吾未見其為完車也軾乎吾知爾之不外飾也天子之車莫不由轍而言車之功轍不與焉雖然車什馬斃而患不及轍是轍者禍福之間也轍乎吾知其免也矣

童子林子名說

陳君舉

古人之名惟所遇焉斯取之矣非擇也商以上迭以甲乙命蓋雜紊而無當至於周諱行而名始尊然曰顛曰夭非美辭也而取之以名春秋之世猶不厚乎名衛有石惡晉有鞮戾齊有陳逆楚有屈蕩周有史佚夫數辭者皆人之愧焉而至不美者也而取之以名展禽解狐若是者則有取乎物之賤者以自名下而漢晉士方以名相高唐以來士無陋名名美而人才日卑嗟夫專於其內而不張於其外急乎其外而不勵乎其內古今人之異也宜哉而二子之請甚矣其非古人之意也名不若人汲

汲乎求治之心不若人則姑徐徐而已耳蓋亦反其本乎雖然
二子以自治之請來余又何可辭之於是名章子曰用中林子
曰毅章子愿而固林子弱而浮以其名之得微中乎心夫二子
由是焉而反之斯名也其猶二子之益友乎里名勝母曾參不
入彼里名豈足以免吾孝哉而君子亟去焉亦合內外之道也
然則二子之請於余余不吝於二子雖非古人之意是亦古人
之意而已矣

朱甥子減名說

陳君舉

吾兄有朱甥者每遇予持尺紙拱而問名焉予曰爾何若名之
問也人能美名名不能美人淑爾身雖陋爾名人不爾議也爾
身之不淑假而以丘軻自號焉天下莫之予矣是故古之爲名
姑用是焉別稱道而已矣賢否不係也爾何名之問也雖然童
子而知問名可嘉也凡人之善自一念而爲也故患莫大於無
慕學莫強於自與爾知重而名則必知重而身矣噫是念足以
爲善矣吾故名爾曰子減而猶未爾字越十年吾將爾考焉而
不負吾名字爾未晚也

古詩

命子

前段見宗族門

陶淵明

卜云嘉日占亦良時名汝曰儼字汝求思溫恭朝夕念茲在茲
尚想孔伋庶其企而厲夜生子遽而求火凡百有心奚待於我
既見其生實欲其可人亦有言斯情無假日居月諸漸克於孩
福不虛至禍亦易來夙興夜寐願爾斯才爾之不才亦已焉哉

詩話

同榜改名

宋郊字伯庠在翰林有指公姓名傳以他說者公因請更名嘗移書葉道卿清臣目為同年葉荅云清臣宋郊榜第六人登第徧閱小錄無宋庠者不知何許人公荅詩云紙尾勤勤問姓名禁林依舊玷華纓莫驚書錄題臣向便是當年劉更生

雜著

係命字

字可為氏

古者名以正體字以表德名終則諱之字乃可以為孫氏孔子弟子記事者皆稱仲尼呂后微時嘗字高祖為季至漢爰種字其叔父曰絲王丹與侯霸子語字霸為君房江南至今不諱字

古不諱字

或問子思稱夫子為仲尼先生曰古人未嘗諱其字程先生云予年十四五從周茂叔本朝先輩尚如此伊川亦嘗呼明道表德如唐人尚不諱名杜甫詩云白也詩無敵李白詩云飯顆山頭逢杜甫

朱語錄

江南祝有道字序

黃魯直

黟川祝林宗因知命問字於涪翁涪翁字之曰有道而告之曰漢東國士惟郭有道尚友千載雖遠可到廓爾曾次以觀群躁

張說子難字說

黃魯直

南陽張說子難嘗以名字求余為序余辭以不能而求不已子難温成后家門戶方燁燁然觀子難折節僚友間如寒士不可

謂不智予嘗以人所不能并之語犯之而子難不怒也不可謂
 不強強且智是將升君子之堂孰能禦之則告之曰君子易事
 而難說聖人語也彼可以怒而去可以拊而來皆凡民耳維君
 子於此道飲則列於樽羹食則形於籩豆坐則伏於几立則垂
 於紳升車則鸞和與之言張樂則鍾鼓爲之說顛倒風雨而守
 此道者猶晏然彼方脅肩求入獻笑不情必且莫逃於水鑑之
 中雖然聾者妙於見秋毫之末而瞽者聽微惟絕利一源耳不
 去害道者無自而入道寧成爲少吏必陵其長吏爲人上操下
 如東濕王肅方於事上而好下佞已在已則昧在人則昭此亦
 學士大夫之同病哉君子之待人也或不屑之教誨細人之司
 噉使我化而與之歸故神兵經物而不疾其鼠斃人而不知寇
 在外而關世弱可不戒哉

稱呼

群書要語國君不名卿老世婦大夫不名世臣姪娣士不名家
 相長妾君大夫之子不敢自稱曰余小子大夫士之子不敢自
 稱曰嗣子某不敢與世子同名 曲禮 自稱曰老夫 曲禮 君子疾
 沒世而名不稱焉 語 古者稱師曰先生 韋昭辨名 府君夫人漢
 人碑已有之只是尊神之辭府君如官府之君或謂之明府今
 人亦謂父爲家府 朱語錄

詩句甚愧丈人厚 杜 愁吟獨老翁 杜 時呼張丈喚殷兄 白 晚歲
 當爲田舍翁 柳 今爲紅藥主人翁 歐

天子稱朕

始皇已并天下李斯等議曰有天皇有地皇有秦皇秦皇最貴臣等昧死上尊號王為秦皇命為制令為詔天子自稱曰朕蔡邕注曰朕我也古者上下共稱之至秦然後天子獨以為稱

稱天子曰陛下

李斯等議曰今陛下興義兵誅殘賊蔡邕注陛下階也天子必有近臣立於階側以戒不虞謂陛下者群臣與天子言不敢指斥故呼在陛下者與之言因卑達尊之意

稱天子曰官家

李侍讀仲容善飲號李萬回直宗飲量無敵飲則詔公一夕上

命巨觥仲容曰告官家免巨觥上因問何故謂天子為官家仲

容舉蔣濟萬機論曰五帝官天下三王家天下兼三五之德故

曰官家上大喜曰所謂君臣千載遇李曰惟有忠孝一生心湘

山野錄

自稱牛馬走

司馬遷上任少卿書自稱太史公牛馬走

推尊曰公

馬融告高密縣為鄭玄特立一鄉曰鄭君好學實懷明德昔大

史公廷尉于公謁者僕射鄧公皆漢之名臣又四皓有東園公

夏黃公潛光隱耀世嘉其高皆悉稱公然則公者仁德之正號

不必三事大夫也今鄭君鄉宜曰鄭公鄉

呼鼠子

魏文帝詔曰此鼠子自知不能保爾許地也

孫權傳注

婦人鄉壻

王安豐婦鄉安豐安豐曰婦人鄉壻禮為不敬後勿如之婦曰親愛鄉故鄉鄉我不鄉鄉誰復鄉鄉

同儕稱鄉

庾敳字子嵩王衍不與敳交敳鄉之不置衍曰君不得為耳敳曰鄉自君我我自鄉鄉我自用我家法鄉自用鄉家法衍甚奇之雜錄

呼小子

王爽嘗與會稽王道子飲道子醉呼爽為小子爽曰亡祖長史

與簡文皇帝為布衣交亡姑亡姊伉儷二宮何小子之有

自稱僕

宋劉凝之隱居南郡臨川王義慶鎮江陵遣使存問答書曰頃首稱僕不為百姓禮人或譏之凝之曰未聞巢許稱臣堯舜時戴顓與衡陽王義季書亦稱僕

稱公輕脫

宋顏延之傳何偃路中遙呼延之曰顏公延之以其輕脫答曰身非三公之公又非田舍之公又非君家阿公何以見呼為公偃慙而退

貴不可鄉

齊陸慧曉未嘗鄉士大夫或問之答曰貴人不可鄉人生何容

立輕重於懷抱

稱第行

北齊張稷為豫章王嶷主簿與劉繪俱見禮接未嘗呼名呼為劉四張五劉逖為開府參軍文宣崩文士並作挽歌楊愔擇之負外郎盧思道用八首逖用二首中書侍郎李愔戲逖曰盧八問訊劉二逖銜之後中書侍郎李愔獻賦逖摘其文奏曰誹謗先朝武成怒大加鞭朴逖喜復前憾曰高捷兩下執鞭一百何如呼劉二時

稱張底

崔湜為中書令張嘉貞為舍人湜輕之嘗呼為張底後議事皆出人右湜驚曰張底乃我輩一般人此終是其坐處隋唐嘉話

天子不名

李吉甫帝尊任之官而不名郭子儀代宗不名呼為大臣陸贄入翰林年前少以才幸天子輩行呼而不名權德輿作贄集序有時燕語不以公卿指名但呼陸九

天下不名

張九齡開元後天下稱曰曲江公而不名李德裕天下士歸重不敢有所斥稱贊皇公而不名元德秀天下重其行謂之元魯山而不名

歇後鄭五

鄭祭本善詩其語多俳諧故使落調世共號鄭五歇後體昭宗署班簿曰可同平章事時省吏走其家上謁祭笑曰諸君誤矣

人皆不識字宰相不及我吏言不妄俄聞制詔下搔首曰歇後
鄭五作宰相事可知矣

古今文集

雜著

稱家父家姑

顏之推

昔侯霸之子孫稱其祖父曰家公陳思王稱其父曰家父母曰
家母潘尼稱其祖曰家祖古人之所行今人之所笑也今南北
風俗言其祖及二親無云家者田里猥人方有此言耳凡與人
言言已世父以次第稱之不云家者以尊於父不敢家也凡言
姑姊妹女子已嫁則以夫氏稱之在室則以次第稱之言禮成
他族不得云家也子孫不得稱家者輕略之也蔡邕書集呼其

姑文為家姑家妹班固書集亦云家孫今並不行也凡與人言
稱彼祖父母世父母及長姑皆加尊字自叔父母以下則
加賢字尊卑之差也王羲之書稱彼之母與自稱已母同不云
尊字今所非也 家訓

自釋

元結

河南元氏望也結子字名也次山結字也世業載國史世系在
家諜少居商餘山著元子十篇故以元子為稱天下兵興逃亂
入猗玕洞始稱猗玕子後家瀆濱乃自稱浪士及有官人以為
浪者亦漫為官乎呼漫郎既客樊上漫遂顯樊左右皆漁者少
長相戲更曰整叟彼謂以整者為其不相從聽不相鈎加帶笮
笮而盡船獨整齧而揮車酒徒得此又曰公之漫其猶整乎公

守著作不帶笏簪乎入漫浪於人間得非聲齟乎公漫又矣可
以漫爲叟於戲吾不從聽於時俗不鈞加於當世誰是聲者於
欲從之彼聲叟不慙帶乎笏簪吾又安能薄乎著作彼聲叟不
羞聲齟於隣里吾又安能慙漫浪人間取而尤汝也醉人議當
以漫叟爲稱直荒浪其情性誕漫其所爲使人知無所存有無
所將待乃爲語曰能帶笏簪全獨而保生能學聲齟保宗而全
家聲也如此漫乎非耶

稱公非一義

柳宗元

天子之三公稱公王者之後稱公諸侯之入爲王卿士亦曰公
有土封其臣稱之曰公尊其道而師之稱曰公楚之僭凡爲縣
者皆曰公古之人通謂年之長老曰公故言三公若周公召公
王者之後若宋公爲王卿士若衛武公號文公鄭桓公其臣稱
之則列國皆然師之尊若太公楚之爲縣者若葉公白公年之
長老若毛公申公涪公

房公墓誌

稱閣下執事

古者三公開閣而郡守比古諸侯亦有閣故有閣下之稱前輩
與大官書多呼執事與足下劉子玄與宰相書曰足下韓退之
與張僕射書曰執事即其例也惟執事則指左右之人尊卑皆
可通稱又自卑違尊例云座前尤非也閣下降殿下一等座前
降几前一等豈可僭用哉

因話錄

封母加太字

故事臣僚封贈母祖母不問生歿並加太字曰太夫人太君政

和間待制劉安上建言太者事生之尊稱也封母而別之所以致別于其婦既歿並祭于夫若加之尊稱則是以尊臨其夫也以尊臨夫于名義疑若未正自是始詔命婦追封並除去太字逮紹興新書復仍舊制晏尚書敦復領吏部援劉待制言申明且引漢文帝紀七年冬十月令列侯太夫人夫人無得擅徵補注謂列侯之妻稱夫人列侯妃子復為列侯仍得稱太夫人蓋此義也於是追封始不復稱太云按帝者之祖稱太皇太后稱母皇太后既升祔止稱皇后正此比也却歸編

稱外姓親

近世故家惟晁氏因以道中戒子弟皆有法度群居相呼外姓尊長必曰某姓第幾叔若兄諸姑尊姑之夫必曰某姓姑夫某姓尊姑夫未嘗敢呼字也甘言父黨交遊必曰某姓幾丈亦未嘗敢呼字也當時故家舊族皆不能若是

後世分等第

洪景廬

東坡云凡人相與號呼者貴之則曰公賢之則曰君其下則爾汝之雖王公之貴天下貌畏而心不服則進而君公退而爾汝者多矣予謂此論特後世之俗如是耳古之人心口一致事從其真雖君臣父子之間出口而言曾不顧忌觀詩書所載可知矣容齋隨筆

跋許將狀元與蔣穎叔樞密帖

洪景廬

前輩與執政書亦猶字之今人年未三十一舉於禮部則鄉先生不敢字之且曰張丈李文丈矣嗚嗚其益薄矣夫

贈梅生說

陳君舉

古者士相號曰子若生子若生非所以賤薄人之稱也能以其
 姓配焉而著者蓋鮮矣商而上惟箕子以子著周衰著莫如孔
 子孔子之徒則顏子曾子有子以子著餘未有聞焉春秋之所
 貴者子之如季子高子是已詩之所美者亦子之若彼妹者子
 是也太史公列傳得子稱者老子孟子荀子樗里子數人而已
 劉氏七略以子稱者七十有六而獨荀子楊子著自唐韓柳今
 天下未有盡子之也至於生著焉者蓋鮮魯有兩生楚有韓生
 皆以生著者也漢之世則酈生賈生伏生歐陽生轅生高堂生
 胡母生而蕭望之號東海蕭生然不以生著天下豈賤薄人之
 辭哉世之澆士其於相誦下之所號乎上者匪君若公上之所

號乎下者亦匪君若公以子若生號人人則以怒予悲之今梅
 生以技遊不藉乎四民而操日者之說以行乎世世之喜福而
 懼禍幸天而憐人者則宗生而予非宗生之說者也以予疾世
 之誦而又非宗生之說者則以生而號焉亦奚不足者而亦怒
 以不受噫予何愛於君若公而不以悅生哉予而愛夫君若公
 而不以悅生者宜亦有所感焉者矣生謂斯何遂以為梅生贈
 詩話

閩人請官稱

呂某公歸老於洛嘗遊龍門還閩者執筆歷請官稱公題以詩
 云思山乘輿看山回烏帽綸巾入帝臺閩吏不須詢姓字也魯
 三到鳳池來 後山詩話

欄蘇二

東坡解纜赴黃州山谷嘗避暑城西李氏園題兩詩於壁其一
章云荷舞竹風宜永日水壺涼簟不能迴題詩未有驚人句會
喚謫仙蘇二來秦少游言於東坡日以先生為蘇二大似相薄
志林

欄黃九

山谷有茶詩押腸字韻和者以數四山谷最後有曲几團蒲聽
煮湯煎成車聲遶羊腸之句東坡見之云黃九恁地怎得不窮
故無怨復和云車聲出鼎細九盤如此佳句誰能識 志林

欄歐九

見強記門

新編古今事文類聚卷之二終

新編古今事文類聚後集卷之三

建安

祝穆

和父

編

建業

唐富春

子和

梓

人倫部

名諱

群書要語禮不諱嫌名二名不偏諱逮事父母則諱王父母不
逮事父母則不諱王父母君所無私諱大夫之所有公諱詩書
不諱臨文不諱廟中不諱夫人之諱雖質君之前臣不諱也婦
諱不出門大功小功不諱 曲禮

古今事實

事文類聚後集

卷之三

一

御書堂本

古者不諱

文王諱昌而箕子為武王陳洪範曰使羞其行而邦其昌厲王諱胡而其子宣王時詩曰胡不相畏此詩書不避也 周頌祀文武之樂歌雖曰克昌厥後噫嘻曰駿發爾私此廟中不諱也 春秋僖公名申而書戊申定公名宋而書宋仲幾莊公名同而書同盟此臨文不諱也

臣不為君諱

衛侯諱惡其臣亦有石惡 左傳

漢唐為君諱

漢呂后諱雉令臣呼雉為野雞 武帝諱徹改徹侯為通侯 光武諱秀改秀才為茂才 明帝諱莊改莊助為嚴助 唐高

祖諱淵改劉淵為劉元海改戴淵為戴若思

以同字代父諱

司馬遷報任少卿云同子驂乘蓋指趙談與其父同諱故曰 同子 不避父名

桓玄呼人温酒自道其父名既而曰英雄正麓疎 世說

內諱不出門

王述為揚州刺史初至主簿請諱報曰亡祖先尊名播海內遠近所知內諱不出門餘無所諱

因名改官稱

羊祜為荊州刺史及卒有遺愛州人懷之為諱其名改戶曹為辭曹焉

故犯其名

度支尚書宗如周有人訴事謂曾作如州官也乃曰某有屈滯故來訴如州官如周曰爾何人敢呼我名其人慚謝曰抵言如州官作如州不知如周官名如周早知如周官名如周則不敢喚如州官作如州如周大笑曰令卿自責見侮友深衆咸服其雅量北史

以諱為戲

王亮為晉陵太守時晉陵令沈噴之性龕疎好犯亮諱亮不堪遂啓廢之噴之乃造坐云下官以犯諱被代未知明府諱若為攸字亮父名攸當作無骸尊傍犬為大傍無骸尊若是有心攸無心攸乞告示亮聞之惶恐不履下牀跣足噴之撫掌大笑而

去齊書

以姓名為戲

宋殷淳字子孚與何勗共食孚羨蓋勗曰益殷尊羨勗司空無忌子也孚徐輟筋曰何無忌憚

對客不犯諱

梁武帝詔王僧孺改百家譜合一百七十二卷藏在秘閣王弘好其書曰對千客不犯一人諱

不犯嫌名

范曄泰之子為太子詹事固辭朝議以禮不諱嫌名乃居之唐賈曾授中書舍人以父名忠辭不受議者以中書係曹司名又與曾父名音同字別禮不諱嫌曾乃就職

諱彌父字 見世家門

作史避諱

唐高祖之祖諱虎李延壽唐人也作南北史易石虎以季龍易
韓擒虎以韓擒成

諱樂廢飲

常尚書翼有重名生平不飲酒不務歡為家君諱樂也 丁月晦
芝田錄

諱岳廢樂

劉溫叟父名岳終身不聽樂不遊嵩岱每赴內宴聞鈞奏則涕
泣移時曰若非君命則不至是 青箱雜記

諱石避行

徐積以父名石平生不用石器遇石則避不踐 行狀

惟諱犯賊

包拯尹京禮上之日吏請家諱公瞑目曰吾無所諱惟諱吏之

有賊惡者 翰府名設 杜祁公衍嘗言父母之諱在我而已他人

何預焉公帥并門吏請家諱公正色曰下官無所諱但諱取枉

法賊 青箱雜記

避丞相諱

尚書省文字下六司諸路例皆言勛會曾魯公為相始作勛當
以其父名會避之也 京師舊有平準務自漢以來有是名蔡
魯公以其父名準亦改為平貨務 石林燕語

古今文集

雜著

避諱甚難

顏之推

梁世謝舉甚有聲譽聞諱必哭為世所譏滅逢世滅嚴之子也
 孝元經牧江州遣往建昌督事郡縣民庶競脩牋書有稱嚴寒
 者必對之流涕物情怨駭揚都一士人諱審而與沈氏交沈與
 其書名而不姓此非人情也凡避諱者須得同訓以代之桓公
 名白傳有五皓之稱厲王名長琴有短脩之目不聞謂布帛為
 布皓呼腎腸為腎脩也梁武小名阿練皆呼練為絹乃謂銷鍊
 物為銷絹物或有諱雲者呼紛紜為紛綯有諱桐者呼梧桐樹
 為白鐵樹便似戲笑耳周公名子曰禽孔子名見曰鯉止在其
 身自可無禁至於衛侯魏公子楚太子皆名熾虱長卿名太子
 王脩名狗子正有連及理未為通古之所行今之所笑也此土

多有名兒為驢駒豚子者使其自稱及兄弟所名亦何忍哉前
 漢有尹翁歸後漢有鄭翁歸梁有孔翁歸晉有許思妣孟少孤
 如此名字幸當避之名子者當為孫地親識中有諱襄諱周諱
 清和禹交疏造次一座百犯聞者辛苦無悞願焉

家訓

諱辨

韓愈

愈與進士李賀書勸賀舉進士賀舉進士有與賀爭名者毀之
 曰賀父名晉肅賀不舉進士為是勸之舉者為非聽者不察倡
 而和之同然一辭皇甫湜曰若不明白子與賀且得罪愈曰然
 律曰二名不偏諱釋之者曰謂若言徵不稱在言在不稱徵是
 也律曰不諱嫌名釋之者曰謂若禹與甬丘與菑之類是也今
 賀父名晉肅賀舉進士為犯二名律乎犯嫌名律乎父名晉子

不得舉進士若父名仁子不得為人乎夫諱始於何時作法制以教天下者非周公孔子歟周公作詩不諱孔子不偏諱二名春秋不譏不諱嫌名者康王釗之孫實爲昭王曾參之父名皙曾子不諱昔周之時有騏期漢之時有杜度此其子宜如何諱將諱其嫌遂諱其姓乎將不諱其嫌者乎漢諱武帝名徹爲通不聞又諱車轍之轍爲某字也諱呂后名雉爲野雞不聞又諱治天下之治爲某字也今上章及詔不聞諱游勢秉機也惟宦官官妾乃不敢言及機以爲觸犯士君子立言行事宜何所法守也今考之於經質之於律稽之以國家之典賀舉進士爲可爲不可耶凡事父母得如曾參可以無譏也作人得如周公孔子亦可以止也今世之士不務行周公孔子之行而諱親之名則務勝於周公孔子曾參乃比於宦官官妾則是宦官官妾之孝於其親賢於周公孔子曾參者耶

或諱或不諱

太史公名談故史記無談字季布傳改趙談作趙同范擘父名楚金故爲文皆以今爲茲韓愈爲李賀作諱辨特言在不稱微之說故愈父諱仲卿未嘗諱焉曹志植之子奏議云幹植不強不諱植字三國尤不諱其君名如功以權成是斥孫權之名也

孔氏叢說

論漢唐國諱

周人以諱事神然雖詩言克昌厥後噫嘻言駿發爾私何以不爲文武諱耶至於周禮一書七月一詩去古未遠皆未之諱故

禮有昌本之類詩有虜發之詠其避諱固未如後世之悉特不敢指曰文王昌武王發若泛用二字則不之諱如穆王名滿其後有王孫滿襄公名鄭諸侯亦有衛侯鄭雖曰魯以獻武廢二山是特當時爲尊者諱故改其敖之名而承襲不易厥後又有公孫敖亦足以見泛而言之未嘗諱也後世諱政而正月且易其諱視周爲密矣觀王嘉上封事無教逸欲有國是固爲高祖諱矣及常孟諫詩有曰總齊群邦自是而下犯高祖之諱者凡至五六蓋當楚王戊之時去高祖爲未久而獨不之諱豈漢初懲秦苛禁凡事簡易其避諱亦未如後世之悉至武王諱徹謂之蒯通固爲武帝諱矣至於景帝名啓而史記謂之微子開而漢紀元封元年詔書有夏后啓母石之言何爲不避之耶顏師

古謂史追書之班固非漢臣子歟况刑法志建三典以刑邦國與萬邦作孚之類皆不爲始祖避何耶唐陸贄論關中事每曰與理同道罔不興請釋趙貴先罪狀曰脅從用理韓文進士策問曰堯舜垂衣裳而天下理又曰無爲而理者其舜也與治字皆易爲理避高宗諱也然韓文潮州上表有曰朝廷治平曰爲治曰久曰政治少懈曰魏七治功賀即位曰君臣相戒以致至治舉張惟素自代曰文學治行衆所推與何爲不避之耶中宗諱顯而韓文袁州上表曰顯榮頻煩舉常顛自代曰顯映班序至柳子厚鼓吹曲涇水黃篇云羲和顯曜乘清芬皆犯中宗之諱何也韓公羅池廟碑曰其日景辰矣而賀慶雲表乃曰其日丙戌子厚平淮夷雅曰命官分土則高高韓奕杰人矣而韓賀

即位表乃曰以和萬民又何耶是二者容或邦行之誤而顯治
二字用之非一不應皆誤也

詩話

杜甫諱父名

王立之云老杜家諱閑而詩中有翽上戲蝶閑過幔或云恐傳
者謬又有泛愛憐霜鬢留歡半夜閑余謂皆當以閑為正蓋臨
文恐有自不諱也迂叟李國老云余讀新唐書方知杜甫父名
閑檢閱杜詩果無閑字惟蜀本舊杜詩二十卷內其寒食詩云
隣家閑不遠後王祺本作隣家問不遠其又云曾閃朱旗北斗
閑後見趙仁約說薛間家本作北斗殷由是言之則知杜甫之
不用閑字明矣 侯鯖錄

祖父母

群書要語鼻祖始祖也獸之初生謂之鼻人之初生謂之首梁
益謂鼻為祖或謂之鼻祖 楊雄方言逮事父母則諱王父母不
逮事父母則不諱王父母 曲禮潘尼稱祖曰家祖 顏氏家訓

古今事類

大父行

鄭當時之友皆大父行

祖父見異

賈逵自為兒戲弄常設部伍祖父習異之曰汝大必為將 魏志
以視與孫 見年齒門

見祖畫像

魏曹休祖父嘗為吳郡太守休後至吳郡太守官舍見壁上祖父畫像乃下榻涕泣

祖憂後嗣

晉何曾侍武帝宴退告其子道曰國家應天受命創業垂統吾每侍宴未嘗聞經國遠圖惟說平生常事非貽厥孫謀之兆也後嗣其殆乎此吾子孫之憂汝等可沒指諸孫曰此輩必遭亂亡及遵之子綏死兄嵩哭之曰吾祖其殆聖乎

侍養祖母

以下係祖母

晉李密字令伯父早亡母改醮祖母劉撫養密後徵為太子洗馬以祖母年老無人侍養乃上表陳情

念祖母病

齊宗元卿早孤為祖母所養祖母病元卿在遠輒心痛大病則大痛小病則小痛以此為常鄉里號為宗曾子

祖母命名

李百藥為童兒時多疾病祖母趙氏故以百藥為名

古今文集

雜著

陳情表

李

密

字令伯

臣密言臣以險釁夙遭閔凶生孩六月慈父見背行年四歲舅奪母志祖母劉愍臣孤弱躬親撫養臣少多疾病九歲不行零丁孤苦至於成立既無叔伯終鮮兄弟門衰祚薄晚有見息外

無暮功強近之親內無應門五尺之童執執牙立形影相弔而
劉夙嬰疾病常在牀蓐臣湯藥未嘗廢離逮奉聖朝沐浴清化
前太守臣達察臣孝廉後刺史臣榮舉臣秀才以劉供奉無主
辭不赴會詔書特下拜臣郎中尋蒙國恩除臣洗馬猥以微賤
當侍東宮非臣隕首所能上報臣具以表聞辭不就職詔書切
峻責臣逋慢郡縣逼迫催臣上道州司臨門急於星火臣欲奉
詔奔馳則以劉病日篤欲苟徇私情則告訴不許臣之進退實
為狼狽伏惟聖朝以孝治天下凡在故老猶蒙矜育况臣孤苦
特為尤甚且臣少仕偽朝歷職郎署本圖官達不矜名節今臣
亡國賤俘至微至陋過蒙拔擢寵命優渥豈敢盤桓有所希冀
但以劉日薄西山氣息奄奄人命危淺朝不慮夕臣無祖母無

以有今日祖母無臣無以終餘年母孫二人更相為命是以區
區不能至遠臣密今年四十有四祖母劉今年九十有六是臣
盡節於陛下之日長報劉之日短也烏鳥私情願乞終養臣之
辛苦非獨蜀之人士及二州牧伯所見明知皇天后土實所共
鑒願陛下矜愍愚誠聽臣微志庶劉僮僕保卒餘年臣生當隕
首死當結草臣不勝犬馬怖懼之情謹拜表以聞

司馬光曾祖政贈太子太保制

蘇軾

勅書曰皐陶邁種德種之遠故其發也難發之難故其報也大
古之君子有種德於百年之前而待報於數世之後者昔聞其
語今見其人某官某故曾祖某官某篤行有聞信于鄉國懷道
不試遺其子孫天不吾欺再世而顯至於曾孫其德日躋衮衣

綉裳進位於朝退有事於家廟其致朕命詔於有神尚食其報以康乃後

曾祖母薛氏溫國太夫人制

蘇軾

勅朕自通籍之臣皆有以寵綏其父母而自祖以上非予承弼之家莫獲褒顯君子之孝至於尊祖以及其妣用邦君之禮以隆其家可謂至矣某官某故曾祖母某氏專靜有守柔嘉維則經之以孝慈締之以恭儉使清白之訓不墜於子孫而隱德之報可質於天地我有異數詔於幽窆翟弗副筭尚服享之

祖炫太子太傅制

蘇軾

勅朕有元臣以德媚於上下民見其羽旄聞其車馬之音則稽首而聚觀之况其父祖墳墓所在望其草木蓋有流涕而拜者錫命之寵豈特以慰其家而已哉某官某故祖某官其篤學力行追配前人仕道難進止於一命無疆之慶在其子孫風流未遠英烈如在歆予寵章以慰民望

祖母皇甫氏溫國太夫人制

蘇軾

勅夫天人之際若不可知而善惡之報各以其類凡今富貴壽考光顯於世朕察其父母大父母未有不仁而得之者也某官某故祖母某氏令德孝恭著於閨門好礼慈儉刑于姻族始生賢子以大其家而餘澤方茂福祿未究再世之後莫之與京愍冊追榮國有常典庶幾幽壤服我寵靈

父母

事養同 舅姑附

群書要語生曰父母死曰考妣曲禮父尊而不親母親而不尊

表記身者父母之遺體可不敬乎祭義父母愛之喜而不忘父

母惡之勞而不怨 父母有過諫而不逆 父母全而生之子

全而歸之 一舉足而不敢忘父母一出言而不敢忘父母可

謂孝矣並同初六幹父之蠱九二幹母之蠱蠱家人有嚴君焉

父母之謂也家人蓼莪孝子不得終養爾蓼上者我匪我伊蒿

哀哀父母生我劬勞 無父何怙無母何恃出則銜恤入則靡

至 父兮生我母兮鞠我拊我畜我長我育我顧我復我出入

腹我欲報之德昊天罔極並蓼陟岵孝子行役思念父母也陟

彼岵兮瞻望父兮 陟彼岵兮瞻望母兮魏風南陔孝子相戒

以養也小雅父兮母兮畜我不卒日月否則侮厥父母曰肯之

人無聞知無逸故親生之膝下以養父母孝經身體髮膚受之

父母不敢毀傷 立身行道揚名於後世以顯父母同上事父

母能竭其力學而事父母幾諫見志不從又敬不違勞而不怨

里仁 父母在不遠遊遊必有方 父母之年不可不知也一則

以喜一則以懼同上父母之心人皆有之滕文邠足以事父母

俯足以畜妻子梁惠君子有三樂而王天下不與存焉父母俱

存兄弟無故一樂也盡心父能生之不能養之母能養之不能

教誨之荀禮秦人借父耰鋤慮有德色母取箕帚立而誅語賈

誼策 旦夕得甘毳以養親聶政傳

舅姑婦事舅姑如事父母曲禮舅沒而姑老傳家事於子婦禮

記室無空虛婦姑勃磈莊外婦姑不相悅則反唇而相稽計

事文類聚卷之三
也賈誼傳歌曰背尊章嫖以忽顏師古曰尊章猶言尊姑也廣川王傳

詩句妾身未分明何以拜姑嫜杜

古今事實

舜為大孝

岳曰瞽子父頑母嚚象傲克諧以孝堯典大孝終身慕父母五

十而慕者予於大舜見之矣萬章

文王大孝

文王之為世子朝於王季日三禮

武周達孝

孔子曰武王周公其達孝矣乎夫孝者善繼人之志善述人之事者也

曾子養志

孟子曰曾子養曾皙必有酒肉將徹必請所與問有餘必曰有曾皙死曾元養曾子必有酒肉將徹不請所與問有餘曰亡矣將以復進也此所謂養口體者也若曾子則可謂養志也事親若曾子者可也

曾子受擊

曾子嘗有為不中曾皙怒援木擊之曾子有頃乃蘇退鼓瑟而歌孔子聞之告門人曰參來勿納也昔舜事瞽瞍索而使之未嘗不在側索而殺之未嘗不可得而小箠則受大箠則走今曾子委身待暴怒以陷父不義不孝孰大焉說苑

三釜不及

事文類聚卷之三
十三
德壽堂

曾子曰吾及親仕三釜而心樂後仕三十鍾而不消吾心悲莊
子曾子曰往而不可還者親也故孝欲養而親不待是故椎牛
而葬不如雞豚之逮親存也初吾爲吏祿不及金尚欣欣而喜
者非以爲多也乘其逮親也既沒之後吾嘗南遊於楚得尊官
焉堂高九尺傳嘗百乘然猶北嚮而涕泣者非爲賤也悲不逮
吾親也故家貧親老不擇官而仕韓詩外傳

閔子之孝

孔子曰孝哉閔子騫人不間於其父母昆弟之言

百里負米

子路曰家貧親老不擇祿而仕昔者由也爲親百里負米親沒
南遊於楚從車百乘累綯而坐列鼎而食顧負米百里豈可得

乎木欲靜而風不停子欲養而親不逮枯魚銜索幾何不蠹一
親之壽忽如過隙悲哉家語

啜菽飲水

子路曰傷哉貧也生無以爲養死無以爲葬子曰啜菽飲水盡
其歡斯之爲孝禮

風木思養

孔子出行聞有哭聲甚悲至則臯魚也被褐擁劍哭於路左孔
子下車而問其故對曰吾父好學周流天下而吾親死一失也
高尚其志不事庸君而晚無成二失也少失交游寡於親友而
老無所託三失也夫樹欲靜而風不止子欲養而親不待往而
不可返者年也逝而不可追者親也吾于是辭矣立哭而死于

是孔子之門人歸養親者一十三人

韓詩外傳

老萊戲采

老萊子老養二親行年七十嬰兒自娛着五色采衣嘗取漿上堂跌仆因卧地爲小兒啼或弄鳥鳥於親側

高士傳

伯俞泣杖

韓伯俞有過其母笞之泣母曰他日未嘗泣今何泣對曰他日得笞常痛今母之力不能痛是以泣也

說苑

休沐謁親

石慶爲內史建老白首萬石君尚無恙每五日洗沐歸謁親入子舍竊問侍者取親中褰廁踰身自洒以爲常

爲親捧檄

毛義家貧以孝行稱府檄以爲郡守義手捧檄而入喜動顏色張奉薄之後義母亡遂不仕奉歎曰往日之喜乃爲親也

王尊孝子

王尊遷益州刺史先是王陽爲益州至邛崃九折坂嘆曰奉先人遺體柰何數乘此險後以疾去及尊至此坂問吏曰此非王陽所畏道耶吏曰是尊叱其馭曰驅之故世以王陽爲孝子王尊爲忠臣

捨養入京

歐陽詹閩人也父母老矣捨朝夕之養以來京師其心將必有得而歸爲父母榮也雖其父母之心亦皆然詹在側雖無離憂其志不樂也詹在京師雖有離憂其志樂也若詹者所謂以志

養志者歟 韓文

諸生歸養

陽城為國子司業引諸生告之曰學者所以學為忠與孝也諸生有父不歸省其親者乎明日謁城歸養二十輩有三年不歸侍者斥之

作相親存

唐宰相二親存者惟元振一人 李邕撰郭元振行狀 宋宰相最少者惟王溥罷相時父母皆在人以為榮富弼入中書時年五十二太夫人在堂康強後三年太夫人薨有司議贈卹典云無見任宰相丁憂例是歲三月春宴百司已具前一夕有旨富弼母喪在殯特罷宴此車亦世所未有 歸田錄

親老不仕

包孝肅公拯始及第以親老侍養不仕者且十年當時莫不稱其孝 言行錄

貴思養親

范文正公為參政時告諸子曰吾貧時與汝母養吾親汝母躬執爨而吾親甘旨未嘗克也今而得厚祿欲以養親親不在矣汝母亦已蚤世吾所恨者恐令若曹享富貴之樂于是俸賜常均於族人并置義田宅云

割股和藥

張密學奎性篤孝為御史時母病乃齋戒割股肉和藥進之母病遂愈 行狀

割股進糜

雷孝子者名天錫年十一父疾甚天錫從母奩中竊剔刀割股
縷切真糜中以進父飲之下咽輒甦病良已范石湖作傳

姑留其婦以下係舅姑

鄒孟軻既娶將入室其婦袒於內孟子不悅遂去不入婦辭母
求去姑召軻而謂之曰夫禮將上堂聲必揚所以戒人也將入
戶視必下恐見人過也今子察於禮而責於妻不亦遠乎孟子
遂留其婦謝之君子謂孟母知禮而明姑婦之道列女傳

自咎悟姑

樂羊子妻不知何氏女嘗有他舍雞謬入垣內姑盜殺食之妻
對不食而泣姑恠問故妻曰自傷居貧使食他肉姑悟竟棄之

痴聾姑公

宋庾仲文傳何尚之奏曰仲文嘗言不痴不聾不成姑公

誠喻痴聾

隋長孫平為工部有告都督鄧紹非毀朝廷為憤憤者文帝怒
將斬之平奏曰諺云不痴不聾不成大家翁上乃赦紹 郭暖
嘗與昇平公主琴瑟不調暖罵公主倚乃父為天子我父嫌天
子主恚入奏上曰他父實嫌天子不作使不嫌社稷豈汝家有
也尚父杖暖詣朝堂待罪上曰不痴不聾不成大家阿翁小兒
女閨闈之言大臣安用聽賜賚而遣之尚父杖暖數十語錄

古今文集

雜著

鄂人對

韓愈

鄂有以孝為旌門者乃本其自於鄂人曰彼自剔股以奉母疾愈大夫以聞其令尹令尹以聞其上上俾聚土以旌門使勿輸賦欲為後勸鄂大夫嘗曰他日有是人乎愈曰毋疾則聞烹飪藥石以為是未聞毀傷支體以為養在教未聞有如此者苟不傷於義則聖賢當先眾而為之也是不幸因而且致死則毀傷滅絕之罪有歸矣其為不孝得無甚乎苟有合乎孝之道又不當旌門蓋生人之所宜為曷為異乎既以一家為孝是辨一邑里皆無孝矣以一身為孝是辨其祖父皆無孝矣然或陷於危難能固其忠孝而不苟生之逆亂以是而死者乃旌表門閭爵祿其子孫斯為法為勸已矧非是而希免輸者乎曾不以毀傷為罪滅絕為憂不腰於市而已贖於政况復旌其門

思歸賦

王逢原

祿有可慕祿有可去何則移孝為忠曾無內顧則祿可慕而可據上有慈顏以喜以懼故祿可去而不可寓噫吾父八十母髮亦素尚爾為吏負焉遐路嗷嗷晨烏其子反哺我豈不如爵其誰訴惟秋之氣慘慄而感人日興愁思側睇江濱憶為童子當秋凜辰百果始就迭進其珍時則有紫菱長腰紅芡圓實牛心綠蒂之柿獨苞黃膚之栗青辛連區烏裨五出鴨脚受形而微核木瓜鏤丹而成質赤乳之梨頰壺之橘蜂湧淹麩楨檀漬蜜膳羞則有鳩鵲野鴈澤鳧鳴鶉清江之膏蟹寒水之鮮鱗胃以紫薑推以芡苳觴浮萸菊俎薦菁韭坐山溪之松篁埽門前之

桐柳僕侍不詳圖書左右或靜默以終日或歡言以對友信吾
心之所樂安閭里其滋久切切余懷欲辭印綬固非效淵明之
所褊心耻折腰於五斗蓋自成人乃今未嘗一日侍旁而稱壽
豈得不決去於此時將恐貽患於厥後

律詩

送許八拾遺歸江寧觀省

杜甫

詔許辭中禁慈顏赴北堂聖朝新孝理祖席倍恩光
內帛擎偏重宮衣美更香淮陰清夜驛京口渡江航
春隔雞人晝秋期燕子涼賜書誇父老壽酒樂城隍
看盡曾饑渴追蹤恨淼茫虎頭金粟影神妙獨難忘

甫昔時於前生 吳乞瓦 信寺 維摩圖 樣

送唐州崔使君侍親赴任

白居易

連持使節歷專城獨賀崔侯最慶榮
烏府一拋霜簡去朱輪四
從板輿行發時正許沙鷗送到日
方兼竹馬迎惟慮郡齋賓友
少一盃春酒共誰傾

新編古今事文類聚後集卷之三 終

新編古今事文類聚後集卷之四

建安 祝穆 和父 編

建業 唐富春 子和 梓

八人倫部

父子

餘見愛子知子及世家門

群書要語為人子止於孝為人父止於慈大學父作之子述之

中庸父子篤兄弟睦家之肥也禮運父子非禮不定禽獸無禮

故父子聚鹿曲禮父者子之天喪服幹父之蠱有子考無咎蠱

卦父父子子兄兄弟弟夫夫婦婦而家道正正家而天下定矣

家人卦父子之道天性也孝經父子主恩孟子父子之間人所

難言

漢書

子雖至親西伯食其肉不然則死於姜里也父雖至

尊沛公索其羨不然則臣於項籍也

文粹馮用之權論

慧種生

聖痴種生狂

越絕書

詩句鳳雛驥子生有種毛骨往往傳諸郎

坡

汗血固應生有種

同上

古今事實

賢否不類

堯之子丹朱不肖舜之子商均亦不肖 以瞽叟為父而有舜

烹子遺羹

文王長子曰伯邑考紂烹以為羹以賜文王曰聖人不食其子

羹文王食而得之紂曰誰謂西伯聖者與食其羹而不知

世紀

樂羊為魏將而攻中山中山之君烹其子而遺之羹樂羊坐於

幕下而啜之盡一杯文侯謂褚師贇曰樂羊以我故而食其子

之肉答曰烹其子而食之且誰不食樂羊罷中山文侯賞其功

而疑其心

韓非子

拜前拜後

詳見世家門

橋梓為喻

伯禽與康叔見周公三見三笞之二子乃問商子商子曰南山

之陽有木名橋南山之陰有木名梓何不往觀之二子往見橋

木高而仰梓木實而俯還告商子商子曰橋者父道梓者子道

也

世說

證父攘羊

事文類聚

卷之四

德壽堂

七

德壽堂

葉公問孔子曰吾黨有直躬者其父攘羊而子證之孔子曰吾黨之直者異於是父為子隱子為父隱直在其中矣

父子責善

公都子曰匡章通國皆稱不孝焉夫子與之遊又從而禮貌之敢問何也孟子曰夫章子子父責善而不相遇也責善朋友之道也父子責善賊恩之大者夫章子豈不欲有夫妻子母之屬哉為得罪於父不得近出妻屏子終身不養焉其設心以為不若是是則罪之大者是則章子已矣離婁

父不傳子

輪扁曰臣也斲輪得之於手而應之於心臣不能以喻臣之子臣之子亦不能受之於臣天運

忍傷父名

田叔為魯相卒魯人以百金祠少子仁不受曰無以百金傷父名

殺翁分羹

項羽聞成皐破亦軍廣武與漢相守楚軍食少項王患之乃為高俎置太公其上告漢王曰今不急下吾烹太公漢王曰吾與若俱北面受命懷王約為兄弟吾翁即若翁必欲烹而翁幸分我一杯羹項王怒欲殺之項伯曰且為天下者不顧家雖殺之無益也

怒子進諫

曹參代蕭何為相國日夜飲酒子窋為中大夫惠帝怪之令窋

言曰無以請事何以憂天下
密洗沐歸具言參怒之乃笞二百
曰趣入侍天下事非汝所當言

是父是子

石奮石建父子之美也無是父無是子無是子無是父

楊子

數過擊鮮

陸賈爲太中大夫呂太后欲王諸呂賈自度不能爭之廼病免
以好時田地善往家焉有五男乃出所使越橐中裝賣千金分
其子子二百金令爲生產賈常乘安車駟馬從歌鼓瑟侍者十
人寶劔直百金謂其子曰與汝約過汝汝給人馬酒食極歡而
更所死家得寶劔車騎侍從者一歲中往來遇宅客率不遇再
過數擊鮮無久溷汝爲也

晚方識父

霍去病父仲孺以縣吏給事平陽侯家與侯侍者衛少兒私通
生去病仲孺吏畢歸家娶婦生子不相聞久之去病爲驃騎將
軍擊匈奴道出河東至平陽傳舍遣迎仲孺趨入拜謁將軍迎
拜因跪曰去病不早自知爲大人之遺體也仲孺扶服叩頭曰
臣得託命將軍此天力也去病大買田宅奴婢而去

從子之諫

後漢吳祐父恢爲南海太守祐年十二隨父到官恢欲殺青簡
竹以寫書祐諫曰今大夫踰越五嶺遠在海濱其俗誠陋舊多
珍怪上爲國家所疑下爲威權所望此書若成卽載之兼兩昔
馬援以薏苡興謗王陽以衣囊徼名嫌疑之間先賢所慎恢奇

之乃撫其首曰吳氏世不乏季子矣

素違父命

有恨子者家貲萬金而自少小不從父語臨亡意欲葬山上恐兒不從倒言葬我着渚下石磧上恨子曰我由來不奉教令今當從此一語遂盡散家財積土繞之成一洲長數百步元康中始為水所壞恨子前漢人也

太平御覽

遊父子間

班嗣在京師家有賜書內足於財父黨楊子雲已下莫不造門本傳陳群字長文通達有識度其所交皆父黨也曾國孔融與群父紀友又與群交唐郝士美好學善記覽父友顏真卿蕭穎士輩嘗與討論經傳應對如流既而相謂曰吾曹異日當交二

郟之間矣

同上

昇輿傳代

原穀者不知何許人祖年老父母厭患之意欲弃之穀年十五涕泣苦諫父母不從乃作輿昇弃之穀乃隨收輿歸父謂之曰爾焉用此凶具曰穀乃後父老不能更作得是以收之耳父感悟愧懼乃載祖歸侍養尅已自責更成純孝穀為純孫

孝子傳

見太平御覽

共阿戎談

阮籍素與王渾為友渾子戎字濬仲年十五少籍二十歲而籍與之交每歲渾俄頃輒去過視戎良久然後出謂渾曰濬仲清賞非卿倫也共卿言不如共阿戎談

見子未見父

嵇紹始入洛或謂王戎曰昨於稠人中始見嵇紹昂昂然如野鶴之在雞群戎曰吾復未見其父耳父則中散嵇叔夜也

見子不見父

薛勤仕郡為功曹陳仲舉年十五為父齋書詣勤勤顧而察之明日造焉仲舉父出迺勤勤曰足下有不凡子吾來候之不從卿也言議盡日汝南先賢傳

相門有相

見世家門

將門有將

王猛之孫鎮惡喜論軍國大事或薦鎮惡於劉祐與語說之曰吾聞將門有將鎮惡信然

責子不賢

王述蒙顯授義之耻為之下遣使詣朝廷求分會稽為越州行人失辭大為時貴所笑既而內懷愧歎謂諸子曰吾不作懷祖而位遇懸逸當由汝等不及坦之故耶

子散父財

郗愔好聚斂積錢數十萬嘗開庫任其子超所取超性好施一日中散與親故都盡

責不褒父

袁宏遷桓溫記室後為東征賦賦末列稱過江諸名德而獨不載桓彝溫知之後游青山飲歸命宏同載問宏云聞君作東征賦多稱先賢何故不及家君宏曰尊君稱謂非下官專敢既不

事文類 卷之四 六 後書堂
違啓不敢請之耳温曰君欲爲何辭宏卽答曰風鑒散朗或搜
或引身雖可亡道不可殞宣城之節信義爲先温泫然而止宏
賦又不及陶侃侃子胡奴嘗於曲室抽刃問宏曰家公勲跡如
此君賦云何相忽宏窘急答曰我已盛述尊公何乃言無因曰
功以濟時職思靜亂長沙之勲爲史所贊胡奴乃止

求增父秩

孫逖遷中書舍人父嘉之且八十猶爲令逖求降外官增父秩
帝嘉納拜嘉之宋州司馬聽致仕

訪索得父

呂向之生父岌客遠方不還後有傳父猶在者訪索累年不獲
他日自朝還道見一老人物色問之果父也下馬抱父足號慟
行人爲流涕

父清臣清

胡質仕魏爲荊州刺史子威自京師省父留十數日告歸父賜
縑一匹曰吾俸祿之餘也及威爲徐州刺史武帝問卿清孰如
父對曰臣父清畏人知臣清畏人不知

譏父銅臭

崔烈嘗問其子鈞曰吾居三公於議者何如鈞曰大人少有英
稱歷位卿守論者不謂當爲三公而今登其位天下失望烈曰
何爲然也鈞曰論者嫌其銅臭烈怒舉杖擊之鈞狼狽而走烈
罵曰死卒父搗而走豈孝乎鈞曰舜之專父也小杖受大杖走
此恐陷父於不義非不孝也烈慙而讓官

父子驍勇

達奚震驍勇走及奔馬周文曰非此父不生此子

北史

傷父被刑

吳郡陸襄父閑被刑襄終身布衣蔬飯雖薑菜有切割皆不忍食居家惟以搗摘供厨豫童熊康父以醉被殺終身不復嘗酒然禮緣人情思由義斷親以噎死亦不可絕食也

顏氏家訓

責子貴重

宋顏延之子竣貴重延之謂曰平生不喜見要人今不幸見汝

殊有鳳毛

謝鳳之子超宗有文辭帝大嗟賞謂謝莊曰超宗有鳳毛

朔望歸省

唐王起子龜性高簡無貴胄氣以光福第賓客多更住永達里林木窮僻構半隱亭以自適侍父

河中盧中

條山朔望一歸省

州人號為郎君谷

子入郡境

柳公綽居外藩其子每入境郡邑未嘗知既至每出入常於戟門外下馬呼幕賓為丈皆許納拜未嘗笑語款密

西平有子

李晟傳帝狩梁州晟泣曰國家多難乘輿播遷見危死節自吾之分乃自東渭橋以精騎萬人破賊朱泚率殘卒萬人西走餘黨悉降帝曰天生晟為社稷萬人豈獨朕哉乃拜晟行營副元帥徙王西平郡子愬字元直以蔭補憲宗討吳元濟以愬為節

度會大雨雪行七十里夜半至懸瓠城雪甚城旁皆鵝鶩池翹
今擊之以亂軍聲翹入城擒吳元濟 柳子厚幸淮雅曰惟西
平有子惟我有臣

父子討賊

吳元濟叛皇帝若曰韓弘汝以卒萬二千屬而子公武往討之
曰弘汝其以節度都統將軍 平淮碑

各得父一絕

宋之問父令文富文辭且工書有力絕人世謂之三絕都下有
牛善觸人莫敢嬰令文直往拔取角折其頸殺之後之問以文
章起第之悌以驍勇聞之孫精草隸世謂皆得父之一絕

對管華近

溫大雅遷黃門侍郎而彥博亦為中書侍郎對管華近帝嘗從
容謂曰我起晉陽為卿一門耳

事決於子

令狐綯為相每朝廷大事一取決於子瀉如元載之伯和李吉
甫之德裕瀉頗招權受賄言事者攻其短綯為其子訟獄

諸子侍立

竇儀尚書本燕人性嚴重家法整肅尚書每對客坐即二侍郎
三起居四參政五補闕皆侍立

三子列侍

陳省華蜀人堯叟堯佐堯咨皆進士及第而伯仲為天下第一
晚年與燕國夫人馮氏俱康寧堯叟知樞密院次子直史館少

子知制誥每對客三子列侍客不自安省華曰學生列侍常也
士大夫以為榮灑水燕談

朝服侍立

王溥拜相年三十二其父祚累遷防禦使每見客溥常朝服侍
立客不安求去祚曰學生勞賢者起避耶歸田錄

手植三槐

王晉公祐宋太祖朝為知制誥使魏州 太祖曰使還與卿王
溥官職時王溥為相使還 帝怒安置華州七年不召初祐赴
貶時親朋送祐曰意公作王溥官職矣祐笑曰某不做兒子二
郎必做二郎者文正公旦也祐手植三槐于庭曰吾子孫必有
為三公者已而果然天下謂之三槐王氏邵氏錄

子班父前

吳正肅公育在二府太保公以列卿奉朝請父子在廷士大夫
以為榮而公踧踏不安自言子班父前非所以示人以法顧不
敢以人子私亂朝廷之制願得罷去不聽

父子主新法

荆公置條例司用程伯淳為屬一日盛暑荆公與伯淳對語公
子雱囚首跣足携婦人冠以出問荆公曰所言何事荆公曰新
法數為人沮方與程君議雱箕踞以坐大言曰梟韓琦富弼之
首於市則新法行矣荆公遽曰兒誤矣伯淳正色曰方與參政
論國事子弟不可預姑退雱不樂去伯淳自此與荆公不合遺

書

父子著名

韓忠憲意子獻肅絳門下侍郎維尚書右僕射韓忠獻琦子

門下侍郎忠彥范文正仲淹子忠宣純仁並以勲業著曹

武惠彬子武穆寶臣高武烈瓊子穆武繼勳並以武功著蘇

老泉洵子文忠軾文定轍號三蘇以文章著

古今文集

古詩

送鄭涵校理詩序

韓愈

鄭生涵始以長安尉選為校理人皆曰是宰相子能恭儉守教訓好古義施於文辭者如是而在選公卿大夫家選之子弟其勸耳矣今生始進士獲重語於天下而慊慊若不足真能守其

家法矣其在門下者可進賀也來告來寧朝夕侍側東都士大夫不得見其面於其行日分司郎吏與留守之從事切載酒設席定鼎門外盛賓客以餞之既醉各為詩五韻且屬愈為序相公倦台鼎分政新邑洛才子富文華校讐天祿閣壽觴嘉節過歸騎春衫薄鳥哢正交加揚花共紛泊交親誰不羨去去翔寥廓

困詩

顧况

困哀閩也困生閩方閩吏得之乃絕其陽為臧為獲致金滿屋為髡為鉗如視草木天道無知我罹其毒神道無知彼受其福郎罷別困吾悔生汝及汝既生人勸不舉不從人言果獲是苦困別郎罷心摧血下隔地絕天及至黃泉不得在郎罷前

送李校書

杜甫

代北有豪鷹生子毛盡赤渥洼騏驎兒尤異是龍脊李舟名父
 子清峻流輩伯人間好妙年不必須白誓十五富文史十八足
 賓客十九授校書二十聲輝赫眾中每一見使我潛動魄自恐
 二男兒辛勤養無益乾元元年春萬姓始安宅舟也衣綵衣告
 我欲遠適倚門固有望歛衽就行役南登吟白華已見楚山碧
 藹藹咸陽都冠蓋日雲積何時太夫人堂上會親戚汝翁草明
 光天子正前席歸期豈爛熳別意終感激長雲濕袞斜漢水饒
 巨石無令軒車遲衰疾悲宿昔

律詩

漢高帝

可正平

殺翁分我一杯羹龍種由來事杳冥何用生兒作劉季暮年無
 骨葬昭陵

詩話

拜家慶

唐人與親別而復歸謂之拜家慶孟浩然詩云明朝拜家慶須
 着老萊衣

入蜀迎父

番陽張吉父介方娘時父去客東西川不還張君自為兒時與
 尚書彭器資同學作詩云應是子規啼不到致令我父未歸家
 聞者怜之既長走蜀父初無還意乃還省母復至涪關往返者
 三其父遂以熙寧十年二月至自蜀鄉人迎謁歎息器資贈以

詩略云河可以竭山可徙我翁不歸行不已三往三復翁歸止
翁行尚壯今老矣兒昔未生今壯齒郭功父詩略云父昔離家
子方孕子得其父今壯年胡弗歸兮死敢請慰我慈母心懸懸
三往三復又十載孝子執鞭方言還 復齋謾錄

母子

羣書要語母氏劬勞 凱風 母氏聖善 同上 靡依匪母 陟岵 無母
何恃 蓼莪 焉得諼草言樹之背 注 諼草令人忘憂背北堂也 疏
堂者房室所居之地總謂之堂房半以北為北堂房半以南為
南堂 衛風 母以子貴 注 妻子立則母得為夫人 公羊傳 列侯妻
稱夫人列侯死子復為列侯乃得稱太夫人 漢文 慈母有敗子 李斯

倚門無黃金聘家有白髮親 歐 庶云留汝車慰我堂上慈
公分甘念母慈 山谷

古今事考

壽母

曾侯燕喜令妻壽母 曾頌

臂痛子歸

曾參出薪于野客至其家母即以左手搯右臂臂痛參即馳至
問母曰臂何故痛母曰今者客至搯吾臂呼汝耳 論衡 蔡順少
孤事母孝嘗出求薪有客卒至母望順不至乃啞其指順即心
動棄薪馳歸跪問其故母曰有急客來故啞指以悟汝耳

倚門而望

倚門而望 卷之四 十三 慈壽堂辛

王孫賈事閔王王出走失王之處其母曰汝朝出而晚來則吾倚門而望汝暮出而不歸則吾倚閭而望女今事王王出女不知處尚何歸賈入市曰淖齒亂齊國殺閔王欲與我誅者袒右市人從者四百人遂誅淖齒

置母於誓

鄭莊公直姜氏于城穎而誓之曰不及黃泉無相見也既而悔之穎考叔爲穎谷封人聞之有見於公公賜之食食舍肉公問之對曰小人有母皆嘗小人之食矣未嘗君之羹請以遺之公曰爾有母遺緊我獨無穎考叔曰何謂也公語之故且告之悔對曰若掘地及泉隧而相見其誰曰不然公從之公入而賦大隧之中其樂也融融姜出而賦大隧之外其樂也洩洩遂爲母

子如初君子曰穎考叔純孝也愛其母施及莊公隱

母知子敗見知子門

齧臂別母

吳起出衛國門與其母訣齧臂而盟曰起不爲卿相不復入衛頃之其母死起終不歸後仕衛爲西河守

陵母伏劍

漢王擊項籍王陵以兵屬漢籍取陵母置軍中陵使至則東鄉坐陵母欲以招陵陵母私送使者曰願爲老妾語陵善事漢王漢王長者母以老妾故持二心妾以死送使者遂伏劍而死項王怒烹陵母卒從漢王定天下

母問平反

事類彙編 卷之四 十四 後言堂本
馬不疑為京兆尹每行縣錄囚徒還其母問不疑多為所平反
毋喜笑為飲食言語或亡所出毋怒為不食

白母期友

見交友門

珍饌供母

茅容字季偉郭林宗見之請寓宿旦日容殺雞為饌林宗以為
為已設既而供其母自以草蔬與容同飯林宗拜之曰卿賢乎
哉因勸令學以成德

滂母勉子

范滂字孟博桓帝時以鈎黨禁錮靈帝大誅黨人詔下急捕滂
聞之自詣獄縣令郭楫解印綬欲與俱亡滂曰滂死則禍塞其
毋就與之訣滂曰仲博孝敬足以供養惟大人割不忍之恩毋
曰汝今得與李杜齊名死亦何恨既有令名復求壽考可得兼
乎滂受教再拜辭母曰吾欲使汝為惡則惡不可為使汝為善
則我不為惡行路聞之為流涕考死詔獄年三十三

母為賊劫

遼西太守趙苞到官遣使迎母及妻子為賊所劫質載以擊郡
苞悲號謂母曰欲以微祿奉養不圖為母作禍昔為母子今為
王臣義不得顧私恩遂與賊戰母妻皆被害苞葬訖曰殺母全
義非孝也歐血而死

懷橘遺母

見橘門

失母心亂

徐庶母為曹公所得庶謂劉備曰本欲為明公効愚軼今失老

母方寸亂矣請從此別遂詣曹公

被執存母

曹操執陳宮謂曰柰卿老母何曰宮聞以孝治天下者不害人之親老母存否在明公不在宮也操曰柰卿妻子何曰宮聞施仁政於天下者不絕人之祀妻子存否在明公不在宮也

截髮待賓

陶侃家于廬江之尋陽為縣吏孝廉范逵嘗過侃家倉卒無以待賓母截髮得髮以易酒肴樂飲極歡而去

母期子貴

齊王敬則母嘗謂人云敬則應得鳴鼓角人笑之曰汝子得為人吹鼓角可矣後果封侯給鼓吹

指痛母亡

梁臧盾有至性嘗隨父宿直廷尉府母劉夜暴亡盾左手中指忽痛不得寢及旦宅信報凶問

葡萄遺母

見葡萄門

杜羔得母

杜羔有至性其父河北一尉而卒母非嫡經亂不知所之會堂兄兼為澤潞判官嘗鞠獄於私第有老婦辨對見羔出入竊語人曰此少年狀類吾夫訊之故羔母也自此迎侍而歸又往訪先人之墓邑中故老已盡不知所在館於佛寺日夜悲泣忽視屋柱煤煙之下見數行字拂而視之乃父遺跡云我子孫若求吾墓當於某村家問之羔哭而往梁有老父年八十餘指其丘

隴因得歸葬羔官至工部尚書致仕李肇國史東坡嘗書此事
遺朱康叔云

母老被謫

劉禹錫出為播州刺史詔下御史中丞裴度為言播極遠猿狐
所宅禹錫母八十餘不能往當與其子訣恐傷陛下孝治乃易
播州詳見交友門柳子厚墓誌

母老出使

狄仁傑為并州參軍同府鄭崇質母老疾當使絕域仁傑曰君
可貽親萬里憂乎詣長史蘭仁基請代行時仁基與司馬李孝
廉不平相語曰吾等可少愧矣相待如初

白雲孤飛見雲門

知子必貴見知子門

母識貴人

潘孟陽母劉晏之女問末坐綠衣少年何人曰補闕杜黃裳夫
人曰此人全別必是貴人南部新書

親導母輿

崔邠拜太常卿故事太常始視事大闕四部樂都人縱觀邠自
第去帽親導母輿公卿見者皆避道都人榮之

母慮吟詩

李賀母探囊中見所書詩多即怒曰是兒欲嘔出心乃已耳
母幸其死

嚴武鎮蜀頗放肆及卒母哭曰今而後吾知免為官婢矣

其母福壽

張齊賢拜中書門下平章事母孫氏年八十餘封晉國太夫人
太宗歎其母福壽多賜手詔存問措紳榮之

母疾心動

司馬池嘗奏名禮部將入試殿庭一日心動不能寐曰吾母素
多疾能無恙否及至內門徘徊不能入蓋母亡為友人所匿也
因語其友而友止告以聞有疾池遂號慟而歸

乞早封母

趙康靖公槩會郊祀當進階封且任一子京官公乞以封母郡
太君宰相為公曰方為學士擬封不久矣公曰母八十二朝夕
不可期願及今以為榮許之後遂以為例

百家文集

雜著

閑居賦

潘岳

太夫人在堂有羸老之疾尚何能遠膝下色養而屑屑從斗筲
之役乎於是覽止足之分庶浮雲之志築室種木逍遙自得池
沼足以漁釣春稅足以代耕灌園鬻蔬供朝夕之膳牧羊酪酪
俟伏臘之資稟秋暑退熙春寒往微雨新晴六合清明太夫人
乃御板輿升輕軒遠覽王畿近周家園席長筵列孫子柳垂陰
車結軌或宴于林或禊于汜昆弟班白兒童稚齒稱萬壽以獻
觴或一懼而一喜壽觴舉慈顏和浮杯樂飲綵竹駢羅頓足起
舞抗音高歌人生安樂孰知其他

李觀以著作郎知臨江軍清江縣時歐陽文忠公扶護太夫人喪歸廬陵船過清江太守謂公為文以祭之太守以簡率為訝觀曰無深訝也既而公擊節賞之其文曰

昔孟軻亞聖母之教也今有子如軻雖死何憾尚饗

古詩

歸信吟

孟郊

淡墨洒為書將寄萬里親書去魂亦去兀然空一身

遊子

孟郊

萱草集堂階遊子行天涯慈親倚堂門不見萱草花

遊子吟

孟郊

慈母手中線遊子身上衣臨行密密縫意恐遲遲歸誰言寸草心報德三春暉

律詩

賀陽城郡王衛伯玉太夫人恩加鄧國太夫人

杜甫

衛幕銜恩重潘輿送喜頻濟時瞻上將錫號戴慈親富貴當如此尊榮邁等倫郡依封土舊國與大名新紫誥鸞回紙紫誥紫字有回鸞之勢清朝燕賀人遠傳冬筭味更覺綵衣春奕葉班姑史芬芳孟母鄰義方兼有訓詞翰兩如神委曲承顏體鸞飛報主身可憐忠與孝双美畫麒麟

奉送蜀州栢二別駕將中丞命赴江陵起居衛尚書

太夫人因示從事行軍司馬位

杜甫

中丞問俗盡熊頻愛弟傳書絲鷓鴣新遷轉五州防禦使起居八座太夫人

詩話

詩諷歸養

王稚川調官京師母老留鼎州久不歸侍嘗閱貴人歌舞有詩云畫堂玉佩縈雲響不及桃源款乃歌黃山谷和韻諷之云慈母每占烏鵲喜家人應賦屢屢歌可謂盡朋友責善之義山谷至孝奉母安康君至為親滌溺器未嘗頃刻不供子職

新編古今事文類聚後集卷之四終

